

أموت فى الانحراف

تأليف

وائل الملاح

طبعة ٢٠١٧

الملاح، وائل

أموت فى الانحراف، مجموعة قصصية / وائل الملاح -- الجيزة:
أطلس للنشر والإنتاج الإعلامي، ٢٠١٦ .

١٦٤ ص، ٢٠ سم

تدمك: ٩٧٨ ٩٧٧ ٣٩٩ ٤٤٢٦

١- القصص العربية أ- السخاوى، ريم

ب- العنوان

أموت فى الانحراف

تأليف

وائل الملاح



رئيس مجلس الإدارة
سرمانه ٣١٢ ٣٣٠٤٦٧١

عادل المصري

رئيس مجلس الإدارة
سرمانه ٣١٢ ٣٣٠٤٦٧١

النشر
سرمانه ٣١٢ ٣٣٠٤٦٧١

نوران المصري

رقم الايداع

٢٠١٦/٩٩٢٩

الترقيم الدولى

٩٧٨-٩٧٧-٢٩٩-٤٤٢-٦

الطبعة الاولى

طبعة ٢٠١٧

الكتاب : أموت فى الانحراف

المؤلف : وائل الملاح

الغلاف : ريم السخاوى

الناشر : أطلس للنشر والإنتاج الإعلامى ش.م.م

٢٥ ش وادى النيل - المهندسين - الجيزة

atlas@innovations-co.com

www.atlas-publishing.com

تليفون : ٣٣٠٤٢٤٧١ - ٣٣٤٦٥٨٥ - ٣٣٠٢٧٩٦٥

فاكس : ٣٣٠٢٨٣٢٨

الحكاية من أولها

عندما أرادت زوجتي الحصول على رخصة لقيادة السيارات، بدأت معها مشوار التدريب على السواقة من أوله، ولو أنها كانت تجيد قيادة السيارات بمنتهى المهارة، ولكن للأمام فقط، أما القيادة للخلف فكانت بمثابة عقبة قد تحول بينها وبين الحصول على الرخصة؛ لأن حال زوجتي كحال باقي «الستات» يصعب عليهن التحكم في السيارة وهي تسير للخلف وهو ما يفسر ليه «الستات مايعرفوش يركنوا»، هذا بخلاف طبيعة السواقة الحريمي والتي تتلخص في واحدة قاعدة أمام الدركسيون قاعة الجزمة أم كعب ولابسة شبشب وبتعدل القصة وبتظبط الميكاب أو بتتكم في الموبايل اللي داخل جوه الطرحة وهي بترضع العيل اللي جنبها وفي نفس الوقت بتدور على السي دي اللي وقع في الدواسة، وهو ما يفسر ليه الستات مايعرفوش يسوقوا أصلاً «مش كلهم، عشان محدش يزعل».

وفي رحلة تدريب مراتي على القيادة الخلفية كنا في احتياج لمجموعة من الأقماع نضعها في الشارع بشكل متعرج حتى تمر من خلالهما محاكاة لاختبار القيادة التي سوف تواجهه في وحدة المرور؛ ولأننا فشلنا في الحصول على هذه الأقماع كان الحل الوحيد هو أن أقف لها أنا قمعاً في الشارع.

نعم وقفت قمعاً في الشارع ومن بختي إن الوقت الذي اخترناه للتدريب ولموضوع القمع هذا كان شديد البرودة ليلاً وأنا أقف «متكتك» منتظر المدام تظبط المرايات ومتشوق للضوء الأبيض يطل من فوانيس السيارة معلناً بداية التدريب، ثم ترجع السيارة للخلف وتقترب أكثر فأكثر وصوت بداخلي يكرر: احترس المدام ترجع إلى الخلف... وتمر السيارة بجواري وتكاد تصدمني فعلقت لها على هذا الأداء وهي تمر ملاصقة لي قائلاً: أنتي كده قريبة قوي من القمع «اللي هو أنا».

فوقفت زوجتي بالسيارة قائلة: أيوة بس ما خبطتكش.

فبصوت مبحوح أرد عليها: أنت دايسة على رجلي.

وعلى هذا الحال تكررت المحاولات رغم نزول الأمطار حتى أصبحت أنا قمعاً مبلولاً لا يستطيع إخراج يديه من جيوبه من شدة السقيع وانحنى ظهره انكماشاً من البرد ولكن لازال يملك الحماس ليقوم بدوره كقمع حتى تمر السيارة من حوله فيجري بخطوات أشبه للبطريق للنقطة التالية ليقف فيها ملتزماً بدور القمع، وهكذا حتى نهاية الشارع وذلك تحت أنظار المارة وخصوصاً «السكريوريتي» بتاعنا اللي بيحترمني أوي لأنني في نظره حد مهم، بيألف كتب وبيطلع في التلفزيون.

وبينما كنت أمسح وجهي من قطرات المياه، راودني سؤال حيرني:
إيه اللي يخلي واحد عاقل يقف قمع لواحدة مايعرفهاش، كل اللي بينه
وبينها ورقة وعيل صغير ما يتحسبش!

وبحثاً عن الإجابة وجدت أن السبب في ذلك هو نفسه ما يجعلها
تتحمل سخافتي عندما أوقظها في أنصاص الليالي فتتنفض النوم من
عينها وتجاهد لاستدعاء تركيزها «عشان تقرأ كلام واحد سخيف».
ومن هنا أدركت أن الشخص عندما يبدأ بنفسه معاملة الآخرين
بشكل راقى وإنساني يحثهم على التعامل معه بالمثل.. وساعدني
التفكير بهذا الشكل في إيجاد الوسيلة المناسبة للارتقاء بالمجتمع
ومعالجة بعض تصرفاته العشوائية.

يعني خلاص أنا من بكره الصبح بدري، هبدأ بنفسى وأنحرف..
أيوه هنحرف عن الطريق الغلط اللي الكل ماشي فيه وهاخد السكة
الصح لوحدى، هكون فيها إنسان تانى، إنسان مثالى، إنسان كيوت
عسول لذوذ حاجة جانتية من بتوع زمان، هراقب تصرفاتي في كل
صغيرة وكبيرة وسأتحلى بالذوق والأخلاق والرقي في التعامل، سأشكر
الجميع وأعتذر كلما أخطأت وأتيح الفرصة لغيري وسأحافظ على
الملكية العامة وسألتزم بالدور وأراعي مشاعر الآخرين و... إيه الرغى

ده!٩

من الأخر أنا من بكرة هتقمص دور ملاك بأجنحة بيضاء وهالة
صفراء فوق رأسي والناس بعون الله هتقلدني، وهنحرف كلنا وهتبقى
هيصة وبالتالي هبطل أكتب سلبيات المجتمع وأخيراً هكتب إيجابيات.



التكشير في الوش ما فيهوش معلش

يرن جرس المنبه، أستيقظ بالعافية، مش قادر أتحرك ومكسل أتأوب، أتحمّل على نفسي وأنهض من السرير في كسل ووخم شديدين والتكشيرة تلعو جبهتي كالمعتاد، ولكن عندما أرى وجهي في مرآة الحمام أتذكر الوعد الذي أخذته على نفسي والشخص المثالي الذي سأقوم بدوره من اليوم، وحينها رسمت الابتسامة المشرقة التي سأبدأ بها يومي وأقابل بها الجميع «ماهو مش معقول هبقى ملاك مكشر» وخرجت أصبح على من بالمنزل فشاهدتني زوجتي مبتسماً قالت: «إيه ده؟ عملت مصيبة، صح؟»

- لا أبداً بقولك: صباح الخير.
- أيوة يعني إيه اللي اتكسر؟
- لا مافيش... صباح الخير.
- وريني تليفونك.. مين كلمك على الصبح ومخليك فرحان كده؟

• أنت هتلبسيني تهمة وأنا واقف.. ثم سحبت الساندوتش بتاعي وخرجت من المنزل، ركبت سيارتي ثم رأيت البواب ففتحت زجاج السيارة وقلت له مبتسماً: صباح الخير.

• قسماً بالله العظيم يا باشا لسه غاسلها.. هو الواد شحثة
اللي جاب عليها تراب من حداهم.. وجلت له البيه هايزعج
ماسمعش الكلام.. عيل ناجص رباية.

• لا معلش حصل خير.. صباح الفل.

• ثم تحركت بسيارتي فسمعتة «بيبرطم»: يعني برضو مش
مصدجني... هنعملكم إيه بجى في عيشتكم السوداء دي!

ثم توجهت إلى عملي مبقياً على ابتساماتي في الطريق، صحيح
كان الموضوع صعباً مع الزحام الشديد والسيارات اللي جاية عكس
والموتوسيكلات اللي حواليك بتخايلك زي الهاموش ولكن كنت أذكر
نفسي «مش هتترفز.. مش هتترفز» وأنا محافظ على الابتسامة ولو
أنها لم تعد مشرقة ولكن أقنعت نفسي أن الوضع صعب لكونه اليوم
الأول ولكن مع مرور الأيام سيصبح الأمر سهلاً.

وبينما كنت في الطريق أتحرك ببطء في منطقة مزدحمة
بالسيارات والمشاه كانت تعبر الشارع من أمامي فتاة في عقدها الثاني
تقريباً وكان يبدو عليها الارتباك أثناء العبور فابتسمت وأشرت لها
بالعبور من أمام سيارتي فلم تستجب هي ارتباكاً وفضلت أن تنتظر،
ومع ذلك ومع شخصيتي الملائكية الجديدة أصريت على أن أقف
لها بالسيارة تماماً حتى تعبر في راحة تامة وابتسمت لها من جديد

مصرأً على رأبي فشعرت البنت بالخجل ولعلها بدأت تعتقد أني أتخذ هذا الأسلوب كوسيلة للمعاكسة، فرفضت تماماً وعادت لتصعد على الرصيف من جديد، وقتها سمعت صوتاً جاء من الرصيف المقابل لشخص كان يتابع الموقف وصاح بعلو صوته: ما تحترم نفسك يا بني آدم أنت.

وصلت إلى عملي وفي طريقي لمكتبي قابلت مديري فابتسمت له: صباح الخير يا فندم.

- فنظر لي بامتعاض وفكر ملياً ثم أدار رأسه وأكمل طريقه وهو يقول: مافيش أجازات.
- وفي مكتبي دخل أحد السعاه فابتسمت له: صباح الخير.
- صباح الفل يا باشا.. الغزالة رايقة نجيب الحساب المتأخر؟
- أوبياااا... أدي عيبه بقى... ثم التفت له قائلاً: شوف أنا مراتي تشك فيا ماشي من حقها ولو أنها اتأخرت شوية، البواب يهزأني مايجراش حاجة أهو برضو عشرة عمر، أتشتم في الشارع عادي مش بتلزق، لكن الحكاية توسع وتوصل لفلوس... يبقى لأ كفاية أوي لحد كده، بلا هبدأ بنفسي بلا هباب.

يتسمر الساعي في مكانه يا حرام وهو مخضوض ومش فاهم

حاجة.

- ثم أنهى حديثي معه وقد رجعت لأيام زمان: امشي انجر اعلمي كوباية شاي كشري سكر بره وهاتھالي على مكتبي بسرعة.



البوفيه المفتوح ٤ الأخر

كنت معزوماً في فرح عقبال عندكم في واحد من أهم فنادق العاصمة ولابس ومتشيك وراسم الابتسامة ومستتي البوفيه .

الفرح شيك ومتكلف والصرف باين عليه يعني أكيد هيكونوا متوصيين بالبوفيه إن شاء الله بدون مقاطعة، وفي انتظار اللحظة الحاسمة التي سيعلن فيها الذي جي عن فتح البوفيه ومع العلم إني مش واكل من أول إمبراح مستتي اللحظة دي، كنت أحاول أن أتعايش مع الأحداث بداية من الرقصة الأولى ثم رقصة كل اتين مرتبطين، مروراً بكلمة أبو العروسة التي ألقاها علينا في المايك مردداً أن عينيه قد دمعت عندما رأى ابنته كبرت ومطلوبة للزواج «يا أنكل انجز والنبي كبرت إيه بس دي بنتك عجزت أصلاً»، انتقالاً للعريس اللي أصحابه بيهشتكوه والأكستينشن اللي اتفك من شعر العروسة إلى لحظة شرب الشربات عكس عكاس وقطعة التورته التي يأكلها العريس والعروسة من شوكة واحدة والعروسة بتعمل نفسها متفاجئة والعريس من ناحيته مش عارف ياكل الأول ولا ييوس الأول، والراجل المصور يهزر معاهم ويسحب الشوكة في الوقت المناسب فياكل العريس بوق العروسة ويضحك الجميع وتعم الفرحة وأنشل أنا، ياعم افتحوا البوفيه خلصونا..

أخيراً تتم بالفعل دعوتنا إلى افتتاح البوفيه فأسرعت أنا وقد سبقتني جماهير غفيرة زحفت إلى ركن السلطات وقبل أن أحصل لنفسي على طبق شاهدت معالق وسكاكين تتصارع ورؤوساً تتطاير وكروشاً وكيعان بتخبط في بعض وأطباقاً قد ملئت عن آخرها والطحينة بتشر منها والحلويات مع المشويات في طبق واحد والعصير واقع على الفساتين والجاتو بيحك في الجاكتة ومع إنها كانت اللحظات الأولى لافتتاح البوفيه إلا إن الهيكل العظمي لديك الرومي بدا واضحاً من بعيد .

وبدأت أستعد وشمرت الجاكتة ثم للحظة انتهت.. أنا غير العالم اللي هنا دي خالص، «ده المفروض يعني» أنا بني آدم ثاني غير بتاع زمان، بني آدم انحرف عن المسار الخطأ ليسلك الطريق السليم وهيبداً بنفسه ويغير كل الكلام ده ويرتقي بسلوك مجتمعه، بس السؤال الذي حيرني كثيراً في هذه اللحظة هل فكرة هبدأ بنفسي دي تنطبق أيضاً على ركن المأكولات البحرية؟ بس أصله الجمبري جامبو، طب وبالنسبة للسيمون فيميه؟

عموماً قاومت وانسحبت بهدوء من الأوبن بوفيه واتجهت بطبق سلطة إلى طاولتي، وهناك وجدت الطاولة مزدحمة بكل الأصناف التي رأيته في البوفيه.. أفسحت لنفسي مكاناً وجلست على الطاولة

وحيداً فالباقيين لازالوا مشغولين في جلب باقي الأصناف وسمعت تشجيعات فيما بينهم:

- روح الحقلك حته من الخروف، أنت بتحب الضاني.
- طب أجيب لك معايا أم علي؟

ولم يكن التشجيع فقط هو المسيطر بل لم تخلُ الحوارات من التوبيخات أيضاً:

- مش كنت تجيب لأختك ريش معاك يا طفس!!
- ما هي أكلت الكفتة لوحدها.

ده غير الحوارات الحائرة ما بين تكذيب الشائعات وتصديقها:

- الحق ده بيقولك كان في جمبيري!
- مش عارف بس بيقولوا هينزلوا «سوشي».

ومع متابعة هذه الأحداث والحوارات من حولي كنت قد انتهيت من طبق السلطة الحيلة اللي طلعت بيه من البوفيه والذي شعرت بعده بجوع أكفر، ولم أحاول أن أذهب إلى البوفيه لأجلب الطبق الرئيسي لأنني أعلم جيداً أنني لو ذهبت لن أجد سوى شوية طرشي وطبقين جيلي فراولة ومعلقة لبن فاضلة في حلة أم علي وبرتقالة واقعة على الأرض.

لذا بدأت أتودد للضيوف الكرام الموجودين معي على الطاولة وأبتسم لهم: إيه ده حضرتك سايب ورك الفرخة دي ليه؟ ده التتبيلة بتاعته هاييلة.

- فيرد عليّ: لا والله شبعت اتفضل حضرتك بالهنا والشفاء.
 - أرد بضحكة رافضة: لا شكراً، ثم أراجع نفسي سريعاً فأخطفها وأمصمصها
- بعدها أنظر للأخ اللي قاعد جانبي من الناحية الثانية: على فكرة الشيش طاووك ده رائع.
- فيرد بمنتهى البرود: آه فعلاً.

إيه ده؟ بس كده!، طب أعزم بواحدة طيب، أكيد ناوي تلمهم معاك في كيس أسود للعيال في البيت... وانتظرت حتى التفت إلى العريس والعروسة وهما يرقصان في وسط القاعة وروحت دابب الشوكة خاطف واحدة ووراها واحدة تانية وفي الثالثة أعاد رأسه ونظر إلى الطبق بعدها نظر لي ثم أزاح الطبق بعيداً «ابن الإيه».

بس ولا همني ما أنا خلاص شبعت لكن بصراحة كنت عايز أحلي، حاجة تحبس بقى، فنظرت حولي لم أجد على الطاولة أي حلويات ولكن وجدت بعضاً منها على طاولة خلف ظهري ومع حسن الحظ لم يكن عليها أي شخص في هذه اللحظة «كله بيرقص».

فاستدرت وبحركة خاطفة أتممت المهمة بكل نجاح إلا أنني لاحظت أن ضوء كاميرة الفيديو مسلط علي، فرفعت رأسي لأرى صورتي تملأ شاشات العرض في كل جوانب القاعة وأنا مايل بضهر الكرسي للخلف وبسرق حنة كناية بالشوكة وبوقى مفتوح وعيني مبرقة للشاشة.



obeikandi.com

وطلعت عبيط

ساعات تلاقي واحد كل خلفته ولاد، وواحد تاني كل خلفته بنات،
أنا بقى قابلت واحد سبحان الله كل خلفته قرود...

كنت في أحد المولات مع الواد ابني وفجأة لقيته بيشدني من إيدي
وسحبني وراه.. رايح بيا فين يا ابني.. يكون في علمك مش هشتري
المصاصة السحرية.. برضو شاددني وراه.. على فكرة بقى لو بتفكر
في بالونة سبونج بوب اللي بتطير في السما كل مرة دي يبقى تنسى
خالص.. بردو مجرجرني وراه.

لغاية ما لقيت نفسي في الملاهي اللي بيعملوها دلوقتي في كل
المولات دي عشان يخربوا بيتنا.. وطبعاً وقتها سابني وجري بين
العيال «يا دي الحوسة»، ساعتها تذكرت ولاد الحلال اللي قالولي
ما تتجوزش.. وبالنسبة بقى للي كانوا بيزنوا على الخلفة راحوا فين
دلوقتي؟!

يلا نهايته.. لقيت الواد توغل في الملاهي وفجأة شاف بنت صغيرة
أجنبية ومعها والدتها، قولت هو «غاوي أجنب» هيجري يلعب مع
البنت الصغيرة.. لكن خدع الجميع و«أوبالالال» جري على الأم فاتح

اسبرينت من الوينج اليمين وده ابني وأنا عارفه هايعملهاااا.. وأهو داخل منطلق وفي السكة بيغزل واحد والتاني وينفرد وهيرفع هيرفع أوببااااا رفع فعلاً جيبة الأم والرفعة حلوة... يا نهار أبيض.. الله عليك يا ابني، تسلم إيديك يا حبيب والديك، الموال حلو من أوله.

فجأة الأم بقيت واقفة في المول جيبتها مرفوعة وكله بان والكل أخذ باله من الأحمر... (اللي ضرب في خدودها من كتر الكسوف).

جريت على الواد ابني وشديته بسرعة وهو مش عايز يسيب وأنا أسلك وهي ميتة على روحها من الضحك: «طيبين أوي يا خال».

ولو إني افكرتها هتموته وكنت بحاول أعتذر لها وخليت الواد المفصوص ابني هو كمان يعتذر لها: «يلا يا حبيبي قول سوري وبوس طنط من بؤها قصدي من خدها».. وهي مبسوفة وعمالة تقول: «سو كيو» وأنا عايز أقولها: أبوه برضو كيو أوي على فكرة.

عموماً انتهى الموقف وحاولت أشبط الواد في أي لعبة عشان يركز في حاجة تانية لحد ما عجبته الزحليقة الدوارة، اتزحلق عليها مرة ولسه هيرجع ياخذ لفة تانية هجم عليه خمس قرود بأبوهم وأمهم، واحتراماً للدور ولمفهوم المشاركة، شرحت لابني أن اللعبة ستكون أمتع إذا اشترك فيها مع آخرين وكنت بأمنعه يتقدم نحو الزحليقة إلى أن يأتي دوره ونبهت عليه ألا يأخذ دور غيره «ما هو برضو ابن

ملاك محترم» وانتظرنا لبعض الوقت حتى ينهي العيال كل منهم دوره ويفسحوا له المجال ليشاركهم ولكن لازالوا منهمكين.

عموماً ننتظر شوية كمان مايجراش حاجة وانتهزت الفرصة وتركت الواد منتظر دوره ورجعت للأم الخواجاية أطمئن لا تكون واخدة على خاطرها من اللي جرى ولا حاجة وأنا ما يخلصنيش لازم أصالحها دول برضو يعتبروا ضيوف عندنا يعني مايصحش نزعلهم.

ورجعت لها: «والنبي ما تكوني شايلة في قلبك، طب راسك أبوسها، طب قوليلي سامحتك يا بيبى» وما إلى ذلك حتى تأكدت إنها مش زعلانة وبعد ما ريحت ضميري رجعت للواد الحيلة ابني، لاقيته يا كبد أمه لسه واقف نفس وقفته زي ما سيبتته ولقيت العيال استحوزوا على اللعبة وبيتزحلقوا لوحدهم والأب والأم بيحجزوا... ووقفت أفكر كيف أتصرف في هذا الأمر حتى سمعت الأب ينصح أحد أبنائه بصوت جهوري: إوعى تسيب دورك لحد لا تبقى عبيط.



obeikandi.com

تضامنا مع سطوحنا

أنا عارف إنني آخرتها هتجنن وأجري في الشارع حايف ولا بس
كاسروله في دماغى..

طلعت مؤخرًا سطوح بيتنا مع الرجل بتاع الدش لقيت خير اللهم
اجعله خير، كل ما تشتهي الأنفس من كراكيب، قفصين فراخ مرميين
على جنب، وكنبة أنترية متهريدة ورجلها مكسورة ومصارينها طالعة
ولونها بهت من الشمس، ومجموعة ألواح خشبية بمختلف الأحجام
والمقاسات مرمية في كل حته وحطام مكتب بالكرسي بتاعه وشوية
طوب على رمل ماتفهمش بتوع إيه؟ ده غير أطباق «الدش» اللي باصة
في كل حته وأسياخ الحديد اللي طالعة من الأرض، والأسلاك اللي
على كل الارتفاعات رايحة وجاية في كل مكان.

ونتيجة الكعبلة في الطوب والخشب والأسياخ والأسلاك نزلت من
السطوح متشلفط، كأني طالع من خناقة أتلماوا عليّ فيها ومالقيتش
اللي يحوش عني.

نزلت من السطوح وقد قررت أن أغير هذه الصورة، فقد كنت
مستاءً جداً من اللي شفته وضميري كمواطن صالح لن يسمح لي
أطنش عن هذا المشهد.

فقد قررت أن أنظف السطوح وأتخلص من كل الكراكيب ثم أزرعه وأجعل منه مكاناً حضارياً عبارة عن حديقة صغيرة تجمع سكان العمارة وقتما يشاءون وتعطي منظرًا رائعاً وتحافظ على البيئة وتمدنا بالمحاصيل التي نزرعها .

وعلى نفقتي الخاصة قمت بالفعل بإزالة آثار العدوان وأتيت بمهندسين متخصصين في الزراعة وبالتحديد في مجال تحويل أسطح المباني إلى حدائق وحولت السطوح إلى متنزه جميل وراقي، زرعت به العديد من أشجار الفاكهة التي ستخدم سكان العمارة يعني ليمون على خوخ على رمان وعملت تكعيبة عنب لزوم قاعدة المغربية وماتساش كل ده «على نفقتي الخاصة»، وطبعاً مانسيتش أزرع سلطة «أيوة طماطم وخيار وفجل وجرجير وبنجر»، كما أضفت إلى المكان بعض الكراسي والترايبيزات والشمسيات والأنوار «على نفقتي الخاصة» كما سبق وذكرت.

و «على نفقتي الخاصة» أيضاً اشتريت بعض الزحاليق والمراجيح عشان أطفالنا الشياطين قصدي الحلوين أولاد الجيران، وما اكتفتش بكده، «عشان كنت ممكن أكتفي بكده وخلص» لكن لأ، عملت كمان حوض سمك كبير عشان اللي يطلع يقعد يتفرج ويتبسط «على نفقتي الخاصة».

وبعد انتهاء المهمة افتتحت المكان مع باقي سكان العمارة وعلى رأسهم صاحب العمارة الذي أشاد جداً بالفكرة وبالتنفيذ الراقي وفي الحقيقة هنأني الجميع على هذه المبادرة وعلى الصورة المبهرة التي غيرت من شكل السطوح تماماً، وطبعاً كان لازم يعجبهم طالما كان «على نفقتي الخاصة» هم غرمانين حاجة.

ومباشرة ومن اليوم التالي للافتتاح بدأنا نحن سكان العمارة نجتمع كل ليلة على السطوح نتجاذب أطراف الحديث، نتعارف أكثر ونحكي وندردش ونتم ونشرب ونأكل ونلعب العيال، وهو الأمر الذي جعلني أشعر بفخر شديد بنفسي «يا سلااااااام أخيراً عملت حاجة حلوة في دنيتي» لأ وإيه «على نفقتي الخاصة».

إلى أن أتى لي البواب يوماً يطرق باب بيتنا: «باين عليه عطشان وحد م الجيران وصفله قلتنا» ففتحت له، أخبرني بأنه عليّ أن ألم سريعاً الكراسي والترايبيزات بتاعتي اللي على السطوح.

وللهولة الأولى من فزعي سألته: حصل إيه؟ كابسة؟!

ثم أدركت أنني لم أخالف أي قانون وانتظرته يجاوب، فقال لي بأن هذا الكلام بناءً على طلب صاحب العمارة.

صاحب العمارة! «يا وقعة سودا يا ولاد» ما الرجل كان بيفتتح
المكان معنا ومبسوط وزى الفل، إيه اللي جرى؟

- يقطع البواب تفكيرى ويقول: يلا يا بيه بسرعة أحسن العمال
زمنهم على وصول وعايزين يبدأوا شغل.
- عمال! عمال إيه يا بني آدم أنت؟
- فابتسم البواب ابتسامة عريضة وهو يقول: ما هو عقبال
أملكك صاحب العمارة هيبنى فوق السطوح دورين تانيين.

•••

معاناة درجة أولى

كل ما أكون راكب طيارة وأفكر إن دلوقتي العيال على الأرض بيشاوروا علينا وشايفنا حته حديدة رفيعة بتلمع في السما بدخل الحمام، ولما بشوف كابتن الطيارة بيتمشى بين الركاب واحنا طاييرين بحس إنني عايز أجري عليه وأترمي تحت رجله «إلهي يخليهم لك يا سيدنا البيه ارجع شوف شغلك» وأكثر واحدة ببقى خايف على شعورها جوه الطيارة وعايز أكون دايماً شايف ابتسامتها هي المضيفة خصوصاً وقت المطبات.

قبل سفري بأيام كنت أتحدث لصديق اكتشفت بالصدفة إنه مسافر معي على نفس الطيارة، وقتها شعرت بالإحراج لأنني لن أستطيع أن أجلس بجواره أثناء الرحلة لأنني بصراحة حاجز مقعد في الطيارة في الدرجة الأولى!! «لأ، محدش يبصلي كده، كنت واخذ التذكرة بسعر مخفض» ولأنني علمت منه إنه حاجز تذكرة درجة سياحية فشعرت بشيء من الخجل كوني طالع فيها وسأجلس في مكان أكثر تميزاً مع وجوده على متن نفس الطائرة، وبصراحة مش هتنازل عن الدرجة الأولى عشان أقعد جنبه يعني، هو صاحبي أه بس مش خطيبتي، «ده حتى لو كان خطيبتي يمكن كنت أفسخ الخطوبة».

وَحَلًّا لِلْمَوْقِفِ لَمْ أَجِدْ سِوَى أَنْ أَحْوَلَ إِقْنَاعَ صَدِيقِي بِإِنِّهِ
يَشْخِشُ جِيبَهُ شَوِيَّةً وَيَغَيِّرُ تَذَكُّرَتَهُ مِنْ دَرَجَةِ سِيَاحِيَّةٍ لِدَرَجَةِ أَوْلَى،
وَبَدَأَتْ أَغْرِيهِ: دَوْلٌ فِي الدَّرَجَةِ الْأَوْلَى بِيَقْدَمُوا عَصِيرَ خَمْسِ مَرَاتٍ
فِي الرِّحْلَةِ وَبِيدُولِكَ مَنِيوُ تَخْتَارُ مِنْهُ الصَّنْفَ الَّذِي تَحِبُّ تَأْكُلُهُ، مَشَى
بِيرْمُولِكَ عُلْبَةً عَلَى حَجْرِكَ وَأَنْتِ وَحِظْكِ، وَبِيغْطُوكِ وَأَنْتِ نَائِمٌ
وَبِيحْبِيبُولِكَ مَخْدَةَ لِرَجْلَيْكِ وَأَنْتِ صَاحِي، وَغَيْرُ كُلِّ دَهْ سَاعَاتٍ بِيَبْتَسِمُوا
فِي وَشْكِ، يَا ابْنِي دَهْ الكُرْسِيِّ فِي الدَّرَجَةِ الْأَوْلَى بِيَتَفَرَّدُ سُرِيرٌ وَفِي
الدَّرَجَةِ السِّيَاحِيَّةِ بَتَاعَتِكَ دِي الَّذِي قَدَامَكَ لَوْ مِيلٌ بَضَهْرَ كُرْسِيهِ لُورَا
بِتَلَاقِيهِ قَاعِدٌ عَلَى حَجْرِكَ، يَا ابْنِي دَهْ الكُرْسِيِّ بَتَاعَ الدَّرَجَةِ السِّيَاحِيَّةِ
دَهْ كُرْسِيٍّ ضَيْقٍ وَهَتَلَاقِي الَّذِي جَنْبِكَ لِأَزَقَ فَيْكَ وَلَوْ نَامَ هَتَلَاقِي رَأْسَهُ
عَلَى كَتْفِكَ، وَمَنْ بَابِ الدَّعَابَةِ قَلْتُ لَهُ: يَا ابْنَ الْحَلَالِ دَهْ الَّذِي رَاكِبٌ
دَرَجَةِ أَوْلَى قَاعِدٌ فِي أَوَّلِ الطَّيَارَةِ يَعْنِي بِيُوصَلُ أَسْرَعُ.

وَمَعَ ذَلِكَ ظَلُّ مَتَمَسِّكًا بِرَأْيِهِ أَوْ بِمَعْنَى أَدَقِّ مَتَمَسِّكٍ بِالْقَرَشِيِّينَ
الَّذِي حَيْلَتُهُ مَشَى عَائِزٌ يَصْرَفُ مَلِيمٌ زِيَادَةً فِي الرِّكُوبَةِ، بَسْ مَكْنَشُ دَهْ
السَّبَبِ الْوَحِيدِ لِرَفْضِهِ، بَلْ كَانَ السَّبَبُ الرَّئِيسِيُّ هُوَ إِنَّهُ فَاكْرُنِي بِهَزْرٍ،
فَاكْرُنِي حَاجِزٌ دَرَجَةِ سِيَاحِيَّةٍ عَادِيٍّ وَبِشْتِغَلُهُ وَبِحَاوَلِ أَفْهَمَهُ إِنِّي حَاجِزٌ
دَرَجَةِ أَوْلَى؛ لِذَلِكَ كَانَ طَوَّلُ الْوَقْتِ وَأَنَا بِحَاوَلِ أَقْتَعُهُ عَمَالَ يَرُدُّ رَدُودٌ
مِنْ نَوْعِيَّةٍ: يَا عَمَّ أَنْتِ لَاقِي تَاكَلِ... تَلَاقِيكَ هَتَسَافِرُ شَعْبَطَةَ فِي دَيْلِ
الطَّيَارَةِ... يَا عَمَّ أَنْتِ كُوَيْسٌ لَوْ رَكْبُوكِ مَعَ الشَّنْطِ... تَلَاقِيهِمْ حَاجِزِينَ
لَكَ مَقْعَدَ الْحَمَامِ.

نهايته لم أفجح في إقناعه أو تغيير الصورة التي رسمها في ذهنه عن تذكرتي وجاء يوم السفر وصعدت إلى الطائرة وجلست في مقعدي ولازال الركاب يصعدون واحداً تلو الآخر ويأخذون أماكنهم داخل الطائرة، إلا بي أرى سيدة عجوز في حالة صحية متأخرة تصعد إلى متن الطائرة على كرسي متحرك وتنقل منه إلى مقعدها في الدرجة السياحية محمولة على أيدي طاقم التمريض الخاص بها، وقتها تحرك الملاك بداخلي واستدعيت المضيئة وأبلغتها عن رغبتني لتبديل الكرسي الخاص بي مع هذه السيدة العجوز لعله يوفر لها مزيداً من الراحة أثناء هذه الرحلة الطويلة.

وبالفعل بدلت مقعدي وذهبت لأجلس في مقعدها ثم حضر الشخص الذي يحجز المقعد بجوارها، نظرت إليه وصرخ ضحك انفجرنا به احنا الاثنين، «طلع الواد صاحبي» وهو يضحك لأنه فاهم نفسه قفشني متلبس بالدرجة السياحية وأنا بضحك لأنني عارف إنه مش ممكن يصدق مهما شرحت له حقيقة الموقف اللي حصل.

وفضل طول الرحلة يتريق عليّ: ماتروح تقعد درجة أولى ولا الدنيا حر هناك.

- يا عم والله سببت الكرسي لست المريضة.
- أيوه أيوه، صادق بس أنا كنت بقول يعني لو كان الكرسي واسع عليك في الدرجة الأولى خليه يحطولك فرشة.

- يا عم الكرسي كويس أنا اللي سييته بمزاجي.
- ويا ترى هيجيبولك منيو الأكل هنا ولا هتطلبه دليفيري.
- يا ابني أنت مش مصدق ليه؟ أجيب لك المضيفة تقولك؟!
- لأ فيه حل أسهل من كده.. وريني التذكرة.
- التذكرة سايبها في الجاكت اللي أخذته مني المضيفة وحطيته في دولاب الدرجة الأولى.
- ضحك بعلو صوته فرج على الكابينة بأكملها ثم قال: أيوه ما أنا عارف، بس أنت صعبان عليّ.
- ليه؟
- هتوصل متأخر، مش برضو بتوع الدرجة الأولى بيوصلوا أسرع «قالها ثم ظل يضحك حتى وصلنا إلى أرض المطار».
- ودلوقتي بس عرفت ليه اللي بيقتعد على كرسي بيتبت فيه ومش بيرضى يسيبه.



أنا أستاهل اللي يجرى لي

مصر البلد الوحيدة اللي ممكن تلاقي فيها سواق للأسانسير..

ولكن من حسن حظي، الأسانسير اللي كنت أقف منتظراً أمامه داخل مبنى البنك لم يكن لديه سواق، وعندما نزل المصعد دخلت ودخل بعدي عدد من الأشخاص حتى امتلأ المصعد عن آخره «كان أول الشهر والبنك زحمة» وقبل أن يغلق المصعد أبوابه دخل شاب تخين جداً ومش مكفيه «لسه بياكل شوكولاتة»، وقتها أضاء زر الإنذار بالأحمر وسمعنا صافرة تعلن عن زيادة الحمولة.. ومع إن جميع من كان بالمصعد سمع هذا الصوت إلا هذا الشاب السمين لم يسمعه أو هكذا تظاهر.

وعلى أساس إنه كان آخر من ركب المصعد انتظرنا أن يخرج «منه لنفسه»، إلا أنه لم يبالي وظل منهمكاً في الشوكولاتة، وبقي الحال على ما هو عليه لمدة تكفي لكي تشعرك بالخنقة، مما دفع أحد ركاب المصعد لأن يوجه له الكلام بشكل غير مباشر قائلاً: يا إخوانا آخر واحد ركب يخرج لو سمحتوا».. مع ذلك صاحبنا لم يحرك ساكناً وعامل أطرش أو عامل ميت أو عامل من بنها.

ووقتها تيقنت إنه كان من سوء بختي أن هذا المصعد بلا سائق، لعله كان يستطيع أن يحسم الموقف.. وبدا واضحاً إن مافيش غيره صاحب نظرية «هبداً بنفسي» وجو الأفلام ده هو اللي هيحل الموقف، واتخذت قراري وضحيت هنايا فداه واستأذنت الجميع وتخطيتهم نحو باب الأسانسير وخرجت سالباً منهم بعض من الحمولة التي تسمح لهم بالصعود آمنين، «ما هي فكرة المثالية دي هتطلع على نافوخي».

وانتظرت المصعد لينزل من جديد وعندما فتح بابه هذه المرة خرج منه كهل يحمل بعض الأوراق ولكنها سقطت من يده بمجرد ما خرج من الباب، وبدا الأمر صعباً عليه أن ينحني ويجمع أوراقه، «وطبعاً مين اللي هيلم له ورقه؟»

بدأت أجمع الأوراق من الأرض بينما الأسانسير يتركني ويصعد من جديد وعندما انتهيت من جمع الأوراق وأعطيتها لصاحبها شكرني جداً ولكن أخبرني بأن هناك ورقة ناقصة فبحثت له عنها ولكن لم أعثر عليها، فانتظرت المصعد لعلها سقطت بداخله وعندما وصل اكتشفت أنها كانت فعلاً بالداخل، التقطتها سريعاً والتفت لأعطيها لصاحبها وألحق بالأسانسير إلا أنني لم أجد الرجل، بحثت عنه في كل ركن داخل البنك إلى أن رأيته متوجهاً نحو باب الخروج، جريت

نحوه ومددت له يدي بالورقة، قال: لا يا ابني خلاص دي طلعت ورقة مش مهمة.

رجعت بسرعة للأسانسير كان قد صعد من جديد طبعاً، حلفت ميت يمين إني مش طالع فيه وطلعت على السلالم.

وعندما صعدت إلى الموظف المختص اللي كنت محدد معه موعد سابق للمقابلة، فوجئت به يقول لي: معلى حضرتك اتأخرت شوية والأستاذ أخذ دورك.

قلت أكيد الأستاذ ده طالما سامع هذا الحوار هينتفض فوراً ويرجع لي دوري خصوصاً وإني ما تأخرتش غير دقائق معدودة، ولكن لم يصدر منه أي ردة فعل.

فألقيت نظرة على الأستاذ اللي أخذ دوري ده، لقيته هو نفسه الواد التخين اللي كان معطل الأسانسير بس خلص الشوكولاتة.



obeikandi.com

ظبطت ساعتني... متلبسة

طبعاً كلنا في مصر عارفين إن الخمس دقائق حسب التوقيت المحلي لمدينة القاهرة معناها «نص ساعة، ساعة إلا ربع» وعلى المقيمين خارجها مراعاة فروق التوقيت.

يعني لما حد يقولك خمس دقائق وهكون عندك معناها: تروح تتغدى وتغسل المواعين وتاخذلك تعسيلة هتلاقيه قدامك.

ولما حد يقولك هعدي عليك على الساعة اتنين مثلاً معناها: الميعاد مفتوح من الساعة اتنين لغاية ما تزهب، بس إذا ربنا أذن مش بعد سبعة.

ويا سلام بقى لو حد قالك هاجيلك بكرة، دي على طول معناها: إنه مش هايجي.

واللي يقولك أنا خلاص بركن معناها: لسة هيركب عربيته وجايلك يعني إن شاء الله مسافة السكة.

لكن بقى اللي يقولك أنا على الكوبري تعرف على طول إنه لسه على السرير.

وكنت شخصياً أحفظ قاموس المواعيد هذا وأستخدمه بكل حرفية ومتعاش معاه وظابط مواعيدي مع المجتمع زي الفل، الفرح بيداً تمانية أروح عشرة ألقى العروسة لسة ماجتش، الاجتماع يكون واحدة ونص أصحا من النوم اتنين وألحقه، أدي ميعاد لصاحبي الساعة ستة وأروحله سبعة يجيلي تمانية، وبالنسبة للطيارات مافيش مرة أركبها غير لما ينادوا عليّ في سماعات المطار عشان الطائرة خلاص هاتطير وأنا لسه في المطار بأعمل شوبينج.

لغاية ما نويت والنية لله أنحرف... أيوه أغير هذا السلوك وأحترم المواعيد شوية كنوع من احترام الآخرين والحفاظ على الوقت اللي هو أغلى حاجة «وإن راح منك يا عين» مش هيتعوض.

ولإني كنت أعاني في بداية الأمر لكي أكون دقيق في مواعيدي بدأت أجبر نفسي على الالتزام بالمواعيد عن طريق تغيير ضبط الساعة على موبايلي، يعني قمت بتقديم ساعة الموبايل عشر دقائق إضافية بحيث تسعفني كلما كنت متأخراً.

لكن اللي حصل إنني بقيت أصحا على صوت المنبه بتاع الموبايل وبعدين أفكر إنني مقدم الساعة أرجع أنام تاني...

عانيت كثيراً قبل أن أتمكن من ضبط مواعيدي وأحسب بدقة الوقت المتبقي والوقت الكافي والوقت المتاح والوقت اللازم وما إلى

ذلك حتى أصبحت دقيقاً في مواعيدي كدقة مواطن ألماني يرتدي ساعة سويسري ظابطها على بيح بن.

لكن نسيت إنه في مثل هذه الحالة: «أيد لوحدها ماتصقفش وطير بجناح مكسور مايطيرش»، يعني المشكلة دي بالذات مش ممكن هعرف أغيرها لوحدي، لأبد من تعاون الآخرين معي، لأن التزامي بالمواعيد لوحدي كان معناه إنني أقف في البلكونة متكتك ولابس الجاكتة على اللحم مستتي الواد المكوجي اللي قالي هيجيب القميص بعد عشر دقائق، بعدها أقف في الشارع في عز المطر عشان السواق اللي هيعدي عليّ قالي خلاص أنا داخل على الشارع، وأفضل مستنيه لغاية ما المطر غرق البدلة بالقميص بالفانلة بال «لا مؤاخدة» الشراب، في الطريق وبعد العطلة دي كلها مش ناقص ألاقي الدنيا زحمة، كده هتأخر على ميعادي مع سيادة الوزير «عندي لقاء صحفي مع أحد السادة الوزراء» فنزلت من السيارة العالقة في الزحام أجري في الشوارع لكي ألحق بالميعاد وأصل ملتزماً به، حتى وصلت فعلاً للوزارة وصعدت إلى مكتب سيادة الوزير «طبعاً هتفتكروا إن الوزير لم يلتزم بالميعاد» لكن لا في الحقيقة الوزير كان موجوداً ومنتظراً ولكن المصور الصحفي الذي كان من المقرر أن يلتقط صور الحوار هو الذي لم يحضر بعد .

«طب سيادتك إحنا ممكن نبدأ الحوار لغاية ما المصور يوصل»...
لم يعترض الرجل وبدأنا الحوار وانتهى والمصور لازال لم يحضر
بعد... «إلهي أشوف فيك يوم يكون أخضر وبأستك من فوق يا بعيد»
كلمته في التليفون: أيوه أنت فين؟ فكان رده: جاي خلاص أهو، أنا
على الكوبري.

«ولو عايز تعرف هو كان فين فعلاً راجع قاموس المواعيد المكتوب
في الأول».



الشيشة بالحجارة في قلب العمارة

في مصر لدينا عرض مغري، تشتري محل تحصل على الرصيف والشارع هدية..

العمارة التي أسكنها لا تضمن لك أن تجلس في هدوء دائم ولا أن تستيقظ على راحتك بل هي مثلها مثل أي عمارة مصرية ممكن تسمع فيها أصوات خبط وهبدي في أواخر الليل عشان الباش مهندس اللي في السابع مراته قررت تفتح البلكونة على الريسيبشن أو ممكن تسمع فيها دبديدة فوق رأسك عشان ولاد الحاجة تهاني اللي فوقك أخذوا الأجازة وييلعبوا ماتش كورة «والجون سلطة»، كما إنك ممكن تصحى مفزوع على صباحية ربنا لأن البواب ماسك في خناق الولية بياعة الزبادي والجبنة القريش، وأحياناً وأنت بتتابع المسلسل تقوم منطور من على كنبه الليفينج لأن ابن الجيران «رزع» باب الأسانسير والصوت وصلك بالداخل تماماً كما لو كان انفجار نتيجة عمل إرهابي في بير السلم.

وبناءً عليه قررت أن أبدأ بنفسى قبل أن أرمي اللوم على الآخرين، وأحد من الإزعاج الذي يصدر من شقتنا، وأعطيت التعليمات في البيت «حاكم أنا في البيت صارم أوي» بعد الساعة ١٠ مساءً مافيش

سيفون يتشد، وبعد ١٢ المشي في البيت على طراطيف الصواب، التليفزيون صوته يفضل محبوس جوة الشقة مايطلعش، الغسالة لا تشتغل الصبح بدري ولا بالليل متأخر، والواد المفصوص الصغير لا يعيط ولا يزعق ولا يغني ولا يرقص ولا يتنطط ولا يأكل ولا يشرب «لأ دي ممكن بس من غير ما يصحا الفجر يصرخ عايز لبن».

وكنت أتابع تنفيذ الخطة وحريص عليها وأمنع أي خروج عن النص وماشي في البيت طول الوقت أكتم الصوت وهش وبس وهس لغاية ما حسيت إن الخطة لم تأتِ بأي فائدة فالجميع من حولنا لازال بيخبط ويدبذب ويرزع ويرزع ولم يشعر أحد بصمتنا ولم تنتقل عدوى الهدوء لغيرنا.

فانتقلت بخطتي للمرحلة التالية واجتمعت بسكان العمارة وحدثهم عن أهمية أن نراعي بعضنا البعض وإن من حقوق الجيرة أن يحافظ الجار على عدم إزعاج جاره وإن الحرية بريئة من هذا السلوك، وقد فاجئوني السكان العزاز بتفهمهم لكلامي وأيدوا فكري في أن نتفق فيما بيننا على بعض التعليمات التي نمشي عليها جميعاً كل منا داخل شقته لنحقق من خلالها الهدوء والسكينة لنا جميعاً داخل العمارة وبالفعل اتفقنا على بعض النقاط وكتبتها وعلقناها في لافتة وضعت في مدخل العمارة، والغريب في الأمر أن الجميع التزم بها فعلاً.

ولو إني كنت فآكرهم هاخذوني على قد عقلي لكن بالفعل
تفآآت بهم التزموا بالتعليمات وأصبحت العمارة ليست كأى عمارة
مصرية أخرى، ووقتها تأكدت إن الحكاية بس محتاجة حد يكون
لديه النية الحقيقية للتغيير وبيبدأ بنفسه يفكر وينفذ ويحث الآخرين
وساعتها كل شيء بيتحسن والموضوع يا جماعة واللّه بسيط أوي
صدقوني بس فضل متمسكين بالأمل، فالأمل فى التغيير والتطوير
لازال موجوداً والمجتمع لازال لديه النية للتحسين والارتقاء، والواحد
لو عايز يعمل حاجة بصدق يقدر يعملها، أوعوا تفقدوا الأمل.

ياااه قد إيه أنا سعيد، بجد فرحان بالإنجاز اللي حققته فيكي يا
عمارتن يا حبيبتن كنت أشعر بهذا الإحساس أثناء نزولي من العمارة
صباحاً متجهاً لعملي بينما ألمح على باب العمارة شكائر رمل وأسمنت
كثيرة ولم أفهم سبب وجودهم ولكن «عني ما فهمت أنا مالي!»

رجعت من عملي آخر النهار وجدت على باب العمارة العديد من
العمال يرصون الطوب ويخلطون الأسمنت ويهدون الجدران، فسألت
عما يجري هنا، وعلمت المصيبة... البيه صاحب العمارة قرر يقلب
الدور الأرضي «كافيه».

«يا نهار طين» كافيه!! يعني دوشة وإزعاج وهيصة يعني واحد
حلبسة واثنين عناب وفين يا ابني بقية الحساب وزباين داخله وزباين
خارجة وزباين تانية واقفين ع الباب.

قلت معلش أهو برضو صاحب العمارة يسترزق ويطلع له منها بحسنة يمكن مزنوق في قرشين، نراعي بعض شوية ما يجراش حاجة، إلى أن تم افتتاح الكافيه وأصوات جديدة بدأت تدخل شقتنا لأول مرة.. رمي زهر على رزق قواشيط على خناقات على ماتشات ده غير ضحك وكركرة الزباين على كركرة الشيشة وده كله لغاية الفجر.

صاحب العمارة لم يراع أي حق للجيران وعمل فينا كده بعد ما اتفقنا على قائمة الممنوعات وعلقناها «ده أنا اللي كنت مصورها على حسابي».. ولا لم يكتفِ الرجل بهذا القدر بل استكمل الصورة على حسب التطور الطبيعي للكافيهات في مصر وأخرج كام كرسي على كام ترائيزة على الرصيف وأحاطهم بأحواض زرع لزوم المنظر، وأصبح دخان الشيشة هو الآخر يحل ضيفاً علينا داخل الشقة.

ثم بعدها تأتي برودة الشتاء فيلجأ صاحب العمارة أو بالأحرى صاحب الكافيه لتقفيل الرصيف بألواح زجاجية لحماية الزبائن من قسوة البرودة «لأحسن يسقعوا ويمشوا». وبالتالي الرصيف «اللي هو أصلاً بتاع كل الناس» أصبح بتاع صاحب الكافيه هو وزباينه.

بعدها يشعر صاحب العمارة والكافيه إن الزبائن تعاني من عدم وجود مكان لركن سياراتهم فيخصص لهم دون غيرهم مكان الركن أمام العمارة والكافيه، يعني «اللي يشرب راح يركن واللي مايشربشي

يبعد» وطبعاً تفعيل هذه الخاصية لا يحتاج سوى كام حديدة ترشق في الأرض على كام سلسلة تصل بينهم وما يضرش لو معاهم كام حوض زرع على شوية بلطجية لابسين «ويتر» واقفين ينظموا عملية الركن، يختاروا مين يركن ومين يتركن.

قال وأنا اللي كنت بمشي في شقتنا عامل راقصة باليه في «كسارة البندق» عشان ماعملش صوت وبتفرج على التلفزيون معتمداً على لغة الإشارة وركبت للواد ابني كاتم صوت.



obeikandi.com

حيدان مختار متلخبث

الشعب المصري بطبعه يهوى العزف على آلة الكلاكس.

وقد لاحظت أنني لا أملك مثلهم هذه المهارة عندما كنت أسير بسيارتي يوماً في أحد شوارع المحروسة الجانبية و«على أساس ملاك وكدة» كنت ملتزماً بالسرعة المسموح بها في مثل هذه الشوارع.

صحيح الموضوع كان مملأً جداً لكن أستحمل مايجراش حاجة، كله عشان مصر، وبينما كنت أفكر بهذا الشكل ظهرت من بين السيارات المصطفة بجانب الرصيف سيدة عجوز اختارت أن تمشي بخطواتها البطيئة وسط الطريق، ومع إنني كنت أمشي خلفها إلا إنها لم تلتفت ولم تشعر بوجودي، وعندما اقتربت منها أصدرت صوت الكلاكس حتى تنتبه وتفسح لي الطريق، إلا إنها بمجرد ما سمعت صوت الكلاكس قفزت في الهواء فزعاً واستدارت لي وصرخت في وجهي: إنتوا عايزين تموتونا؟! خلاص عشان راكبين عربيات هدوسوا مخاليق ربنا.

حاولت أن أهدئ من روعها وأشرح لها أنني لم أقصد إزعاجها، لم تعطني الفرصة واستمرت في صراخها: غور بقى من هنا جاتك القرف.. طالما مش بتعرفوا تسوقوا عربيات بتسوقوها ليه؟!!

وهنا تجمع حولنا عدد من الأشخاص الذين كانوا متواجدين في الشارع وقتها ومن كلام السيدة العجوز تخيلوا إنني كنت هصدمها بسيارتي وبادروا برسم السيناريوهات، فمنهم من راح يحكي لصديقه: «تقريباً كان طائر بسرعة جنونية وربنا ستر» ثم يتبرع آخر: «لا ده أكيد كان معاه واحدة ومشغول معاه، ما أنا عارفهم الأشكال دي»، وقبل أن أنطق لكي أشرح لهم الحقيقة يتدخل آخر قائلاً: «يا أخي احترم سنها وبلاش الكلاكسات اللي صدعتونا بيها دي».

وإلى هنا انتهى الموقف وقد أخذت عبرة وعظة وشعرت فعلاً بتأنيب الضمير إزاي أنا كملاك صغير أغلط الغلطة دي؟ إزاي أخض سيدة مسنة بهذا الشكل؟ لها حق طبعاً تنتفض فزعاً من هذا الصوت العالي المفاجئ، وعموماً هو درس كان قاسياً حتى أتعلم كيف يكون التصرف السليم في مثل هذه المواقف.

أيام قليلة مرت قبل أن يتكرر معي مشهد مشابه حيث كنت أسير في شارع جانبي ووجدت كهلاً يمشي وسط الشارع بمنتهى الهدوء واعتبرتها فرصة لكي أثبت فيها حسن نيتي وأصلح الخطأ الذي وقعت فيه المرة السابقة ومشيت خلف الرجل ملتزماً بسرعته وهو لا يشعر بي على الإطلاق وكنت مستعداً للسير خلفه بهذه السرعة أقصد بهذا البطء حتى نهاية الشارع لكي أكفر عن ذنبي السابق ولكي أتصرف بمنتهى الرقي الذي تعهدت أن ألتزم به.

وبينما كنت سعيداً لموقفي هذا ولتلك الفرصة التي أتيت لي،
شعر الرجل بي فجأة وانتفض من الفزع معتقداً أنني كنت على وشك
أن أصدمه، فتحت شباك السيارة لكي أهدئ من روعه فلم يعطني
الفرصة وصاح: الله يخرب بيوتكم.. الله يخرب بيوتكم.

• فيه إيه بس يا حاج؟

• ما تزمروا ولا عايزين تدوسونا.. آمال هم عاملوا الزفت
الزمارة ليه؟

وقبل أن أشرح له أنني لم أكن أرغب في إفزاعه تدخل شخص من
شباك بيته قائلاً: حصل خير يا حاج بس أنت يا أستاذ الحق عليك،
كان الأصول تدوس كلاكس.

•••

obeikandi.com

فاضطريت لأن أعود لمحل الحيوانات من جديد ما هو الرجل
صاحبه ابن حلال وأنا مجربه، وأشرت له فيما معناه: «الحقني
بالشاحن، الحقني بالشاحن» بالظبط كما لو كان مدمن عايز الجرعة
بسرعة...

ووصلت الموبايل بالشاحن فكان السلك قصيراً مما اضطرني لأن
أجلس «أستريح» على الأرض في وسط المحل مخاطباً إذاعة الشرق
الأوسط على الهواء مع دخول وخروج الزبائن من حولي بينما أحكي
أنا عن فضيحتي في بلاد بره «كتابي الأول» وأفشي أسرار كتابي
الثاني «محدث يقول لمراتي».

ومن حين لأخر ألمح صاحب المحل يكتم الضحك حتي أحمر وجهه
وأنا مش عارف هو بيضحك على إيه؟ على المواقف اللي بحكيها، ولا
على الزيون الغريب ده مدمن التليفونات اللي ماعندوش شاحن في
بيته وقاعد على الأرض يفكر مصايبه.



obeikandi.com

أسف على كلمة أسف

وعزة جلاله الله أنا كنت إنسان طبيعي زي بقية الناس لغاية ما اتفهيت في عقلي وأخذت هذا القرار «العبيط» قصدي الأخير..

كنت لما أكسر على حد بالعربية ويزعل ويضرب لي كلاكس أقوم مطلع دراعي من شباك العربية وأشوح له عادي، لما أطلب حد بالتليفون ويطلع الرقم غلط كان أمر مفروغ منه إنني أقفل السكة في وشه «ما هو ماطلعش صاحبي أكمل معاه الكلام ليه يعني؟»، ولما أروح لحد متأخراً عن ميعاده كان شيء بديهي إنني أقوله المحور واقف أو الدائري عليه حادثة فيتفهم الأمر ويقتنع وينتهي الموضوع، كما كنت دائماً أكسر أي حاجة وأقول لصاحبها اتكسرت لوحدها «هو يعني هيفتح لي محضر»، أيضاً كنت عندما أجلس بالخطأ في مقعد شخص آخر في السينما مثلاً أو في القطار كنت أتبع الحل المعتمد لهذا الموقف بشكل تلقائي وأنظر للتذكرة وأقلب فيها متعجباً ثم أرمي اللوم على اللي قطع التذكرة: «ده ملخبط الدنيا خالص» بعدها أترك له مقعده يشبع بيه وأمشي، كما أتذكر إنه كان منطقي جداً لما كنت أركن صف ثاني وأحبس واحد راكن صف أول أنزل أحرك سيارتي «ولا أعبره» وهو المفروض مش هياخد على خاطره، إحنا شعب حبوب وما فيش بينا عقد .

والأمثلة كثيرة على المواقف التي كنت أتعامل فيها بطبيعتي دون تكلف قبل أن أتخذ القرار المصيري هذا الذي اتخذته مؤخراً وهو أن أستبدل هذه التصرفات بكلمة واحدة فقط وهي كلمة «أسف» وربنا يعيني بقى على المصيبة اللي حطيت نفسي فيها .

بدأت أعود نفسي على هذه الكلمة، أصطدم بشخص على الرصيف أقول له أسف، أعدي من أمام شخص فاتح الكاميرا ينوي التصوير أقول له أسف، تنزل مياه من الغسيل بتاعنا على غسيل الجيران أنزل أخبط عليهم عشان أقول لهم أسف، يغلق الأسانسير أبوابه من تلقاء نفسه في وجه شخص ما، أبادر أنا بكلمة أسف، أفتح الشباك فتنتفض العصافير هرباً من الأشجار فأعذر لهم أنا أسف، أركب سيارتي فتفر قطة فزعة من تحتها أجري خلفها أقول لها أسف، أمتع الذباب عن طبقي وأقول له أسف، أنظر للمرايا الألي شكلي يخض أقول للمرايا أسف.

وهكذا حتى باتت الكلمة تسبقني وتصدر عني قبل أن أفكر فيما إن كان الموقف فعلاً يستدعي مني كلمة اعتذار أم لا؟! بل رأيت أنه لمن الرقي والسمو في الأخلاق أن أبادر بالاعتذار للناس عند حدوث أي موقف بدلاً من أن ننصب لبعض المشانق.

وعندما كنت في محل للتحف والأنتيكات النادرة يعني الغالية بل الغالية قوي وكنت أتجول به متفرجاً، وقفت بجواري سيدة مدت يدها على واحدة من الفازات المعروضة وحملتها لتشاهدها عن قرب وعندما أرادت أن تسأل عن ثمنها استدارات فجأة نحوي فارتطمت بكتفي «وأنا والله واقف في مكاني، يمين عظيم ما تحركت» ثم وقعت الفازة على الأرض وتحطمت تحطيماً، وقتها نطق لساني اللي يتقطع من لغاليغه وقال للسيدة: أسف.

وذلك على مسمع من صاحب المحل الذي انتقل فوراً لمكان الحادث وقال: ينفع كده يا أستاذ؟

- مش أنا حضرتك اللي كسرتها.
- ترد السيدة يعني إيه؟ أمال مين؟ مش أنت اللي خيطني؟
- لأ طبعاً، أنا واقف ماتحركتش.
- يتدخل صاحب المحل: إزاي يا أستاذ وأنا سامعك بتقولها أنا أسف أمال يعني بتقولها أسف على إيه!

لم أجد رد وكيف لي أن أشرح للرجل موضوع إني قررت أكون مثالي وأبدأ بنفسي في إصلاح المجتمع والكلام ده.. وقد تسيد الصمت الموقف لفترة حتى تحركت السيدة نحو باب الخروج وهي تقول:

• ما يصحش كده، اللي عمل حاجة يتحمل مسئوليتها مش يرميها على حد تاني.. عن إذنكم.

• وتركت المحل وخرجت بينما يودعها صاحب المحل: اتفضلي حضرتك إحنا هنتصرف.

يا دي المصيبة ده أنا كده هتشقلط، إيه بس اللي كان رمانى على الغلب ده ما كنا عايشين زي بقية خلق الله بلا انحراف، بلا فلسفة فارغة.. ثم نظرت إلى صاحب المحل في انكسار:

• طب حضرتك أنا خلاص حرمت ومش هاعمل كده تاني.

• تاني إيه وتالت إيه ما هي خلاص اتكسرت.

• لأ حضرتك أنا قصدي على كلمة أسف.



المضطر يركب العجلة

«حبيبي وأنت بعيد.. مشتاق للمسة إيد.. من غير ولا أزمة» أيوه

تامر حسني كان عنده حق، الرجل بيتكلم عن الأزمة اللي بنمر بيها كلنا، أزمة البنزين التي تلوح في الأفق من حين لآخر والحكومة تدرس رفع الدعم عن سعر الوقود.

وأنا بصراحة مش هتقف أتفرج طبعاً هتقعد.. أقصد هتقعد أفكر كيف أبدأ بنفسي في حل هذه الأزمة.. يعني أعمل إيه؟ الخطة إزاي يعني؟..... أيوه عرفت.. أيوه صح.. بنزين عربيتي، لازم أستخدم بنزين ٩٥ لأنه غير مدعم أصلاً وبكده هدفك للحكومة الثمن الأصلي للبنزين وهو فر لها شوية بنزين من أبو ٩٢، أيوه بقى هو ده الكلام.

بعدما اتخدت هذا القرار وعندما فرغ تانك سيارتي توجهت إلى محطة البنزين وكلي فخر بنفسي وبدوري الوطني الذي سأعبه وجاء دوري في البنزينة واستكمالاً للمشهد المثالي قلت أمون عربيتي بنفسي ونزلت مسكت مسدس البنزين لقيت مشرف المحطة بيجري بسرعة عليّ: ممنوع يا بيه ممنوع.

عدت إلى سيارتي وبدأت موسيقى رأفت الهجان تصاحب المشهد وأنا أقول للعامل في المحطة: فول ٩٥ .

«ماتقولش إيه إدتنا مصر.. قول هاندي إيه لمصر» كنت أغني داخل السيارة بكل حماس حتى جاءني الرجل وأخبرني بالثمن المطلوب... «يا مرارك يا مهجة يا مرارك» ده أكثر من ثمن العربية نفسها، أنا إيه اللي كان طسني في دماغي عشان أفكر الفكرة الهباب دي.

ثم نظرت بحسرة للرجل وسألته: هو ينفع نسحب البنزين من التتلك تاني؟

ابتسم الرجل ولم يرد.

نهايته دفعت المبلغ المطلوب ثم بدأت أفكر في كلام الناس اللي إيدها في المياه وبتقولك ابدأ بنفسك، أبدأ بنفسي مع البنزين إزاي «مش هينفع حضرتك»... وقتها سمعت صوتاً مجسماً لا أعلم مصدره ولكنه قال: اشترى عجلة يا خفيف، ثم ضحك ضحكات متقطعة شريرة.

صح.. طب والنعمة صح، ومش بتاخذ بنزين وهتوفر تمن الجيم وهتخفف الزحمة وتحافظ على البيئة.

نفذت الفكرة فوراً واشترت عجلة، وفي أول مشوار لها اتجهت بها إلى الشغل، أيوه عادي رؤساء الوزارات في أوروبا يذهبون إلى أعمالهم بالعجلة وأنا مش أحسن منهم في حاجة... خالص.

وفي الطريق إلى الشغل بالعجلة لاحظت السلوك العام للسواقة في شوارعنا وانتبهت إلى أننا بلبس هدموم ماركات لا يتقال علينا بيئة وبنشرب الشوربة من غير صوت عشان مانبقاش بيئة وبنخرج في أحسن كافيهاش بعيد عن القهاوي البيئة وبنتكلم بالإنجليزي عشان العربي بيئة وفي العربية بنكسر ونخالف ونخطف ونرعش ونكبس ونكلكس ونكرمش وده كله يتقال عليه إيه؟ غير إنها سواقة بيئة!

وفي طريقي بالعجلة أيضاً شعرت بأن الشعب كله بيكرهني، كل العربيات نقل أو نص نقل، سرفيس أو تكاتك، ملاكي أو أجرة، الكل بيكسر عليّ بتلقائية شديدة وكأني مش موجود، طلوع الكباري كان متعب بشدة بينما النزول منها كان مخيف للغاية لأن العجلة تنزل منزلقة دون أدنى سيطرة مني، مع إني ماسك الفرامل على الآخر، بخلاف شلة البنات اللي كانوا راكبين عربيتهم وبيشاوروا على وميتين على روحهم من الضحك على منظري وأنا لابس بدلة وراكب العجلة، ده غير التراب اللي سفيته والظلط اللي خبط في وشي والشمس اللي قورت نافوخي «تعالى شويف ابنك اتبهدل يا أما».

عموماً وصلت بالسلامة «مش عارف إزاي» إلى العمل وتركت العجلة لرجل الأمن على المدخل ليحتفظ بها حتى نهاية اليوم لأنني راح عن بالي أن أشتري لها قفل لزوم الركن في الشارع وعندما صعدت

إلى المكتب كان لكل زملائي عندما قابلوني رد فعل واحد، يندهشون أولاً ثم يتفحصونني ويسألون: مالك يا ابني، أنت جاي راكب عجلة؟
ولاد الذين.. عرفوا إزاي؟! عشان يعني بنهج شوية وبعرج حبيتين
وشعري واقف ووجهي أحمر ومترب؟ مش دليل يعني!.. لذلك دخلت
فيهم شمال ورديت عليهم: «هو أنا هسكت»: لأ طبعاً عجلة إيه؟ إيه
العبط بتاعكو ده؟ «ماهو أنا لم أمتلك بعد الشجاعة الكافية للإفصاح
عن انحرافي أمام المجتمع».

وبينما كنت أجلس بين زملائي بالمكتب رأيت العجلة تدخل علينا
من الباب ويحملها رجل الأمن الذي كنت قد تركتها له عند المدخل
وهو يقول لي: اتفضل حضرتك استلم عجلتك عشان الشيفت بتاعي
خلص وهمشي دلوقتي.

صريخ ضحك في المكتب من السادة الزملاء، واللي كان هيتقلب
بالكرسي على ظهره واللي بخ من بقه الشاي اللي كان بيشربه واللي
قعدت تحكي الموقف للشخص اللي بتكلمه في التليفون وباقي الزملاء
جم يجروا من الأقسام الأخرى عشان يتفرجوا على زميلهم أبو عجلة،
وأنا واقف في النص أهبل كده مش عارف أعمل إيه، نفسي أتكر من
العجلة وأقول «أقسم بالله مش عجلتي»، «ويبقوا يعملوا تحليل دي
إن إيه بقى»، لكن العشرة ماتهنوش «ودي برضو عشرة طريق طويل
بكباري وأنفاق وحضر ومطبات».

وطبعاً رد فعل الزملاء والحفلة اللي اتعملت عليّ بالإضافة
لتجربة الذهاب بما فيها من تعب وخطورة كانت أسباب كفيّلة بأن
أترجع نهائياً عن هذه الفكرة منهياً علاقتي بالعجلة تماماً.

وحين جاء وقت الانصراف توّسّلت لأحد الزملاء: إلهي ينوك
اللي في بالك يا قادر يا كريم ولا يغلبكش ولية، ماتاخذنيش معاك في
سكتك لحد البيت ينوبك ثواب.



obeikandi.com

عديني شكراً

تعدية الشوارع في مصر تحتاج إلى توافر عنصر اللياقة البدنية والليونة والرشاقة وخفة الحركة كما تعتمد وبشكل أساسي على التوافق العصبي العضلي والثبات الانفعالي مع سرعة البديهة ورد الفعل، بالإضافة طبعاً لعنصر الخبرة، ذلك كله بجانب السمات الشخصية والتي من أهمها الإصرار والعزيمة وروح التحدي بخلاف الجرأة والشجاعة والإقدام وقوة الإيمان بالقضاء والقدر.

ولصعوبة توفر كل هذه السمات في شخص واحد، عودت نفسي أن أقف بسيارتي بمجرد ما أرى شخصاً يقف على الرصيف وينوي عبور الشارع، وذلك حتى أتيح له الفرصة ليحقق ذلك الإنجاز بأمان، شيء من التحضر والرقي في التعامل مع الآخرين، ما هو أنا خلاص أصبحت ملاكاً حقيقياً، صحيح الأجنحة لازالت لم تظهر بعد ولكن «بدأت تنبت»..

كانت تقف على الرصيف سيدة ومعها شوية عيال ٢ جوة و٢ برة على دراعتها وواحد على كتفها وبتاع خمسة ماسكين في ديل جليبتها ده غير اللي تايه منها وبتدور عليه في وسط إخواته، وعندما لمحت في عينيها الرغبة في تعدي الشارع وقفت على الفور، وبمجرد ما وقفت سمعت «شتيمة» تأتيني من الخلف بس عملت ماسمعتش.

انتهز واحد من العيال الفرصة وجري يعبر الطريق ولكن لم يستطع لأن العربيات من على شمالي لم تقف فلم يتمكن من إتمام المهمة للرصيف المقابل وهنا شعرت أمه بخطورة الموقف: تعالى هنا يا واد.. العربيات هتطسك.

فحاول الولد مجدداً أن يثبت جدارته لكنه لم يستطع.. وأنا واقف ومعطل الشارع كله خلفي والشتيمة اللي عملت ماسمعتهاش في الأول أصبحت شتايم كثيرة ومعها كلاكسات وأنا لسه عامل أطرش. تركت الأم شوية عيال على الرصيف ونزلت لتتقذ ابنها.. وبالفعل مسكت بإيده وشدته لتعود به إلى الرصيف ولكن في هذه اللحظة لم تتمكن هي الأخرى من العودة لأن السيارات التي كانت خلفي ملت الانتظار وقررت أن تمر من على يميني وأصبح المشهد عبارة عن سيارات تمر من على الجانبين والأم وابنها يقفان أمامي وباقي العيال بتعيط على الرصيف والشتائم على أنغام الكلاكسات لازالت مستمرة خلفي ولازلت أنا عامل عبيط.

حتى قررت أن أترك سيارتي ونزلت أساعد الأم وابنها في تعديّة الشارع وحاولت إيقاف السيارات التي تأتي من على شمالي وبالفعل نجحت بالعافية في استعطاف إحدى السيارات ومر الابن إلى الرصيف الآخر بنجاح منقطع النظير إلا إن الأم تحركت بداخلها

مشاعر الأمومة فعادت في غفلة من السيارات لشوية العيال اللي سايباهم على الرصيف الأول.

وقتها فتح الطريق أمامي لأول مرة منذ أن رأيت هذه العائلة وفكرت في التخلي عن أجنحتي «وأرميهم تحت عجل أي عربية» وأنفذ بجلدي من الموقف اللي أنا فيه ده إلا أن الأجنحة نأحت عليّ بصراحة، وعدت لمساعدة الولية بعيالها.

بدأت أشير للسيارات على يميني بأن تقف لي ثواني بينما يشير لهم أمين الشرطة من بعيد بأن يستمروا في سيرهم، ولأنني أقدر إن عدد العيال كبير لن تستطيع السيدة بمفردها حملهم والمرور بهم، فبحركة انتحارية أرغمت إحدى السيارات على أن تقف وتترك لي الفرصة لكي أمر من أمامها وحينها بدأت السيدة تناولني العيال واحد واحد أجري بيهم أضعهم أمام سيارتي وأعود أوقف سيارة أخري لتناولني عيل آخر أنقله وأعود إليها وهكذا حتى نجحنا في تعدية نصف الشارع.

أما النصف الآخر فقد تكفل به أمين الشرطة الله يكرمه وربنا بيارك له في صحته وعافيته يارب ويحفظه لعياله ومراته وينوله اللي في باله يا قادر يا كريم وذلك قبل أن يتوجه لي ويقول: أنت متسبب في تعطيل حركة المرور متعمد يا بيه.

فبدأت أشرح له إني قررت أكون شخصاً مثالياً وأبدأ بنفسني
وكده وإن الولية دي غلبانة وكانت عايزة...
قاطعني قائلاً: رخصك واركن لي على جنب.



في السينما كل فئسار

الذهاب للسينما مراحل.. مرحلة تهتم فيها بوجود الشلة ومرحلة تهتم فيها بالضلمة والصف الأخير ومرحلة تهتم فيها بملابس البطلة ومرحلة تهتم فيها بالقصة وترابط الأحداث، أنا الآن في مرحلة أهتم فيها بأي حاجة تشد الواد ابني.

وزي كل خميس قررنا نخرج نتفسح «أنا ومراتي والمفعوص الصغير، كعائلة سعيدة وكده».. وقد قررنا أن نذهب إلى السينما هذا الأسبوع، «خصوصاً وإني مراعاة لحقوق الملكية بطلت أنزل أفلام من على الإنترنت وبطلت أشتريها مضروبة».

وعند شباك التذاكر رأيت لافتة مكتوب عليها ممنوع اصطحاب الأطفال..

فنظرت إلى زوجتي مصدوما فقالت لي: محدش هياخد باله، وبعدين ما الناس كلها داخلة بعيال أهو.

• لا يا حبيبتي مش أنا.. مش أنا أبداً اللي يخالف تعليمات ولا أنا اللي هعتبر الناس قدوة وأمشي وراهم، لازم نراعي عدم الإزعاج ونحافظ على النظام.. مش أنا اللي أعمل كده، ده أنا إنسان محترم، شخص مثالي، مواطن...

• طب طب، خلاص خلاص، بلاش فضايح يلا نمشي وبلاها
سينما .

• بس أنا عايز أتفرج على الفيلم، ده مكسر الدنيا في أمريكا .

• طب هاعملك إيه يعني؟

• عندي فكرة جامدة جداً .

• اتفضل اتحفني .

• ما تيجي نجيب اتنين فيشار وندخل احنا نتفرج على الفيلم

ونسيب الواد ده رهن عند الراجل بتاع الفيشار .

• يا سلام .. ابنك يساوي عندك تمن اتنين فيشار؟!

• بالكراميل ..

لفحت الواد على كتفها وتركتني وذهبت، بعدها دخلت الفيلم

سعيداً قصدي وحيداً وقبل أن أقرأ على الشاشة «ممنوع استخدام

الهاتف المحمول» كنت قد أغلقته بالفعل .

وبدأ الفيلم وتوالت الأحداث ولسه البطل هيبوس البطلة انتفضت

مذعوراً من صريخ طفل أهله حاطينه ورا وداني ..

وانتظرت حتى يكف عن الصرخ ويتهد شوية لكن واضح إنه مافيش فايده سأشاهد الفيلم بمؤثرات صوتية خاصة جداً.. وقد تدخلت والدته لإنقاذ الموقف فبدأت تحكي له حدوتة تساعد على الاسترخاء والهدوء.

وبالفعل نجحت التجربة وسكت الطفل عن البكاء ولكن لم تكن تلك هي النتيجة الوحيدة لخطة الأم بل كانت النتيجة الأخرى أنها جعلتني أنسى الفيلم تماماً وأتابع رغماً عني أحداث الحدوتة بتاعتها. نام الطفل.. وتمنيت له نوماً هادئاً وأحلاماً سعيدة وحاولت أستعيد تركيزي مع الفيلم حتى رن هاتف الشخص الذي يجلس أمامي.

• ألوووو... إزيك يا باشا... أيوه أنا في السيمما... لا عادي خد راحتك... طب أنت قولت لفاطنة الكلام ده... أصل أنت مش فاهم أحكيك أنا بقى على الموال من أوله...

«يا نهار طين! ده لسه هيحكيه موال».. نفذ صبري وخبطت على كتف الرجل.

• فاستدار لي قائلاً: أيوه يا أستاذ.

• بصوت خافت قلت له: بتهيألي ممنوع التليفون أثناء العرض.

• بصوت جهوري قال: ليه يعني ممنوع؟!.. أنا حر «ثم عدل جلسته وأكمل حواراه عبر الهاتف».

حر!! حر إزاي؟ لأ مش حر أوي للدرجة دي وقبل أن أرتب له كلمتين يشرحوا له معنى الحرية سمعت رنة هاتف تأتي من زاوية أخرى من صالة العرض ويرد صاحبها على المكالمة وتبدأ محادثة جديدة وفجأة وجدت نفسي مع أبطال الفيلم في سينترال رمسيس.

طب أشرح لمين ولا لمين أنا دلوقتي؟ وقررت أن أستدعي أحد مشرفي الصالة لكي أشكو له كم الإزعاج الذي يملأ أرجاء المكان والذي قد زاد عليه عودة الابن الضال «الطفل الذي يجلس خلفي» والذي استيقظ من نومه وعاد للصراخ مجدداً.

وعندما حضر مشرف الصالة، شكوت له ليتخذ الإجراءات اللازمة، لكنني فوجئت به يقول لي بالحرف: مش لازم تسمع يعني يا باشا، ما عندك الترجمة أهيه اقرأها.



دخول الحمام مع سبق الإصرار والترصد

كنت في أحد فروع ماكدونالدز وأقف في الطابور منتظراً دوري ويقف أمامي شخص بجلاية وعمة في عقده الخامس تقريباً، يتحدث مع الكاشير ويمد له الفلوس وهو يسأله:

- في شندوتشات جبنة رومي؟
- رد الكاشير: لأ طبعاً «وهو منتظر أنه مقلب كاميرا خفية».
- رجع الرجل وسأله: طب ما فيش فول؟
- بدأ الكاشير يمل وكرر عليه الإجابة بالنفي.
- فاحتار الرجل وسأل: أمال فيه إيه؟
- فيه هامبورجر وسمك وفراخ.
- طب الفراخ بكام؟
- على حسب، عايزه ساندوتش ولا كومبو؟
- إيه الكومبو ده!!
- خرج الكاشير عن شعوره قائلاً: بص يا حاج متعطلناش

عندك الصور هناك أهيه روح نقي اللي أنت عايزه وشوف
تمنه كام وابقى تعالى.

أحرج الرجل ومشى وهو بيكلم نفسه: «يا ابني وأنا فاهم حاجة».

● جاء دوري وقبل أن أتحدث إلى الكاشير رجع الرجل وسأل:
طب هو ساندوتش الفراخ بكام؟

● وعندما رد عليه الكاشير نظر الرجل إلى الفلوس التي كانت
بيده ثم نظر إلى خارج المحل حيث كان ينتظره ثلاثة عيال
بأمهم، وبخيبة أمل استدار ومشى وهو يقول: متشكرين يا
ابني.

● التفت الكاشير لي: طلب حضرتك.

● المدير وحياتك.

استدعي لي المدير الذي كان يقف إلى جواره فطلبت منه أن يلحق
بهذا الرجل أبو جلابية سريعاً ويخبره أن إدارة المطعم قد اختارت أن
تهديه وجبة عائلية لأي سبب وأنا الذي سيتكفل بدفع ثمن «خمسة
فراخ كومبو» وأمري لله.

وبالفعل نفذ المدير فوراً وأقنع الرجل بأن المطعم قد اختاره لكونه
كان العميل رقم ١٠٠ الذي يمر من بوابة المطعم لهذا اليوم.

وقد حصل الرجل على الوجبات له ولعِياله وغمرتهم الفرحة
بينما جلست أنا على إحدى الطاولات «منفض مش معايا ولا مليم»
ومستني الواد صاحبي اللي كنت ها قبله هنا يجي يعزمني.

وبينما كنت جالساً لا بي ولا عليّ كان يمر من أمامي «تشارلوك
هولمز» واحداً من موظفي المطعم رافع الياقة وعمال يبصلي من تحت
لتحت كل شوية.

وأنا مطنش خالص مش عارف الرجل ده عايز إيه.. ذلك حتى
نويت والنية لله أن ألبى نداء الطبيعة وأذهب للحمام وعند باب الحمام
وقبل أن أدخل جري نحوي هذا الموظف وأوقفني فاردّاً ذراعه أمامي
بملاح حادة وحاجب مرفوع ولسان حاله يقول: «قفشتك متلبس».
فنظرت له بدهشة، قال: الحمام مخصص لزيائن المطعم بس.

- طب ما أنا من زيائن المطعم.
- ابتسم ساخراً وهو كله ثقة: أنت قاعد بقالك ساعة ما طلبتش
حاجة.
- بصراحة حقك.. ما أنا لو حلفتلك من هنا لبكرة إني طلبت
بس مش أنا اللي أكلت عمرك ما هاتصدق.



obeikandi.com

في الجيم ماغلطت غلطتي

الشباب نصهم بيروح الجيم يتعرف على بنات والنص الثاني بينفخ العضلتين لزوم فورمة الساحل وبعد التمرين بيتمنى يحط على العضلة جيل عشان تثبت، أما البنت لما بتحس إنها تخنت فوراً بتشارك في الجيم وتفضل قاعدة في البيت منتظرة النتيجة.

في الجيم الواحد متعود يشيل الوزن ويلعب بيه ويرميه في أي حته ويرجع ياخذ غيره وهكذا «عادي» يعني، و«عادي» برضو تكون عرقان وتجلس على الجهاز فيشرب عرقك كله ومش مهم اللي يجي بعدك يبقى يمسح هو بقى.. ده غير الموبايل اللي ممكن تاخده معاك في ركن في الصالة خصوصاً على جهاز الرجلين وتتمدد وترغي براحتك «عادي» والكل يقف طابور مستتيك تخلص.

مع إن كل ده يعتبر سلوك «عادي» لكن في يوم وأنا خارج من الجيم انتبهت إلى أن هذه التصرفات مش «عادي» بل هي عشوائية لا تليق بشاب مثالي زي حالاتي، فقد قررت أن أغير هذا السلوك «العادي» فوراً بواحد ثاني مش عادي.

وبالفضل ذهبت في اليوم التالي وكلي حماس وواحد الفوطه بتاعتي على كتفي عشان العرق وسايب الموبايل في البيت ومش مركز في التمرين على قد ما أنا مركز في إنى أستخدم الوزن وأرجعه مكانه.

ونفذت الخطة فعلاً واتهد حيلي والحمد لله، كل ما أشيل أوزان وأذهب بها إلى الجهاز أعود وأحملها من جديد لمكانها الأصلي بعد ما أنتهي منها ثم أحمل غيرها لمكان آخر وأعيد الكرة من جديد.. لا وكمان كنت بأحسن من أدائي وأشيل أوزان ناس تانية وأعيدها لمكانها، قال يعني عشان أخرجهم ويعملوا زيي.

في آخر التمرين، وكان خلاص نفسي أقطع، حضرت إلى الجيم فتاة يصعب وصفها عبارة عن كائن غريب، عبارة عن خليط من التقاطيع المسممة تعطي إيحاء بأنها تقاطيع من بلاد الشام أو الأناضول بقوام ممشوق له طابع روسي أو أوكراني ولكن بدرجة لون برونزي برازيلي أو فينزويلي.

ومعروف مع دخول مثل هذه الكائنات إلى الجيم، اللي كان بيثيل عشرة كيلو بيثيل عشرين واللي كان بيعد خمس عدات بيعد خمسين واللي كان طيب مع أصحابه بيفتري عليهم، واللي كان مروح بيقتعد، وأنا من ضمن هؤلاء وقررت ألفت النظر.

وروح جايب بار وهاتك يا أوزان ووقفت أعمل حركات إطالة
للعضلة وتسخين وأي منظر بس لجذب الانتباه.

ثم نمت على البنش والكائن الموز لسه مش عايز يبص، لكن بعون
الله هيبص مع الصرخة دي ورفعت البار: عاااش فوووووق.. واحد
«إيه ده هو الحديد تقل كده ليه عن زمان؟!... ماكنش كده في بداية
التمرين!!»

يااا قوي.. اتتين... هووووب سقط البار على صدري... وأحاول
أن أرفعه عن صدري، إنه يترفع أبداً، «يا عم البار استر عليا البت
واقفة» وأعيد المحاولة من جديد ومافيش فايده.

قررت أريح البار على صدري شوية وأستعيد طاقتي وأحاول
تاني... لكن عضم صدري بيتكسر... وفي المرايا لمحتها واقفة تتفرج،
«يا سلااام، عجبتيك الفرجة دلوقتي!! ما أنا قدامك بقالي ساعة».

حاولت مجدداً أرفع البار، ارتفع لنصف المسافة ثم سقط على
صدري من جديد.. وبدأت أشعر بالأخت الموزة «أطال الله بقاءها»
تقترب نحوي عايزة تساعدي «يا شماتة مراتي فيا».

وقبل أن تصل لي كنت بفلفص من تحت البار وبحاول أميل به
على جنب عشان الأوزان تدحرج وتسقط منه على الأرض لكن تذكرت
إني من فلاحتي كنت حابسها بمحبس الأوزان «واد المعى أوي».

وصلت لي بالفعل النجدة الموزة وسألتني: أساعدك؟

«أبوس إيدك أنت لسه هتسألني» فحاولت أن ترفع الوزن لكن لم تستطع، كان ثقيلاً عليها جداً وكان الحل أنها «تدور تشحت عليّ».. راحت تتادي مشري في الصالة يحضرون فوراً للمساعدة.

وبعد هذا الموقف كنت على يقين بأنني لن أكرر غلطتي وأستنفد طاقتي في إعادة الأوزان إلى أماكنها فيما بعد لأنني ببساطة لن أذهب للجيم ثاني أبداً.



شرم الشيخ ومنه ثاني

أشفقت على العاملين بمجال السياحة عندما كنت في أحد الفنادق وجاء سائح خليجي يسألني: البركة وين؟ وعرفت بعدها إنه يقصد: البسين فين؟

ولما لقيت السياحة في البلد بعافية شوية نتيجة الأحداث الإرهابية الغاشمة التي مرت بنا مؤخراً وبطبيعة الحال العاملين بهذا المجال مخروب بيوتهم، قررت أن أخذ المدام والباش مهندس الصغير ونطلع على شرم الشيخ تنشيطاً للسياحة.

أول ما وصلنا شرم أنا اتخضيت ومراتي قالتلي أنا عايزة أرجع.. شرم مافيهاش خواجات.. والصورة بالطابع المحلي عبارة عن جلاليب نازلة البحر وطرح طالعة منه وترهلات بكل الأحجام وعوامات بكل المقاسات وأكياس بلاستيك على الرملة وعيال بتعمل بيبي في المايه.

• لجأت فوراً لمسئول الأمن بالفندق وسألته: مش برضو عندكم تعليمات بتقول ممنوع النزول إلا بلباس البحر.

• فرد عليّ: مضبوط يا فندم.

• طيب حضرتك في عيال هنا لابسه لباس بس مش بتاع البحر...!

• لا يا فندم نمنعهم حالاً.

• طب وبالنسبة للبنات المتكرين في زي عفاريت.

• لا يافندم ده مايوه شرعي مسموح بيه.

• بس ماتقولش مايوه، ده لبس ضفادع بشرية.

• لا حضرتك ده بكرانيش من عند الوسط.

«أه لا خلاص عندك حق طالما بكرانيش يبقى الغلط عندي».

ألحت عليّ زوجتي أن نغادر بينما تمسكت أنا باستكمال الخطة،

«إحنا مش جاين هنا نتفصح إحنا جاين في مهمة وطنية».

وفي اليوم الثاني وتحديداً وقت الفطار داخل المطعم الرئيسي

للفندق وقفت مزهولاً وسط المكان...

كم هائل من البشر يتحركون جميعاً في كل اتجاه كما لو كنت

دخلت خلية نحل، ويصدرون حجماً هائلاً من الضجيج عبارة عن

«تخبيط السكاكين والشوك في الأطباق ده غير صريخ العيال الصغيرة

وبخلاف الهاتفات بتاعة: يا ميدو هاتلي معاك بطاطس، ويا ماما أنا

عايزة طعميياية من أم سمسسم..

وكل ده كوم والعيال اللي بتجري حوالين التراييزات وبيستخبوا من بعض ورا الكراسي دول كوم تاني، واحد منهم استخبى من أصحابه ورا ظهري وكل ما أتحرك خطوة يتحركها معايا أحسن حد يشوفه، وأخرة ما زهق من حركتي الكثيرة تشبث بالشورت بتاعي وهو يرجوني: وحياء أبوك يا كابتن ما تتحركش.

«يا ابني حاسب الشورت هيقع» وده اللي كان هيحصل فعلاً لما انتفض مسرعاً وأخذ لفة دائرية من حولي وهو ماسك في الشورت عشان واحد من الشلة لمح وهجم عليه من حيث لا يحتسب.

وكنتيجة طبيعية لهذا المشهد كانت أرضية المطعم عبارة عن طماطم مهروسة وعصير مدلوق وبيلزق وفول بالطحينة والحلو مهلبية.

رفضت أن أشترك في هذه الجريمة وقضيت اليوم على لحم بطني بدون فطار وتوجهت لصالة البلياردو أسلي يومي لأنني قررت مش نازل البحر تاني..

أمام تراييزة البلياردو وقفت محتاراً، على ما أتذكر البلياردو على أيامنا كان بيتلعب بعصايتين طوال كده مش بمضارب بينج بونج، هل دخل أي تعديل على اللعبة مؤخراً؟ ما تفسير وجود مضرب بينج على الطاولة؟ مع العلم إن الطاولة خالية من كورات البلياردو أصلاً، أين ذهب هذه الكور؟

رجعت إلى غرفتي أفكر في العودة إلى القاهرة والتخلي عن المهمة الوطنية التي أقوم بتنفيذها فالصعوبات التي واجهتها كانت تحتاج لفدائي محترف وليس ملاك هاوي.

وبينما كنت منهمكاً في التفكير وسط تشجيع مراتي سمعت صوت خبط وترزيع بجوار باب الغرفة، أصوات كانت كفيلة بأن توقظ ابني من نومه مفزوعاً على وصلة عياط ستمتد طويلاً «عارفها كويس». فتحت باب الغرفة لكي أشنق المتسبب في هذا الإزعاج وجدت شلة أولاد في الممر بين الغرف بيلعبوا «بلي» بكورات البلياردو.



أنا بيئة وأحب البيئة

مرة كنت بقول لواحدة سايقة في وسط الشارع «أمشي في حارتك» البنت اتترفتت أوي وقالت لي: حارتي!! الحواري دي تمشي فيها أنت يا بيئة...

وعلى سيرة البيئة لقد انتبهت إلى أنه من ضروريات الشخصية المثالية أن تحافظ على البيئة التي تعيش فيها وبما إنني مثالي مستجد فلا بد وأن أحافظ على البيئة.. هراعي الزرع بتاعي ومش هسيبه عطشان حتى الزرع الصناعي همثل إنني بسقيه، بس ده أكيد مش كفاية أكيد في دور تاني لازم أقوم به تجاه بلدي وأهلي والمجتمع والناس، ولو إنني مش بلوث الهواء بحرق قش الرز لكن ممكن أبطل ألوثه بدخان السجاير والشيشة، يوووو ما أنا أصلاً مش بدخن، خلاص هراعي إن موتور عربييتي يكون سليم عشان كمية العادم اللي خارجة من الشكمان، بس العربية سليمة بصراحة، طب آمال أعمل إيه؟ باين عليّ مثالي من زمان وأنا مش واخذ بالي.

لا أكيد فيه حاجات تانية لازم تتعمل...

- مش هسيب حنفيه المطبخ تخر، كلمت السباك: الحقني تعالى فوراً، إلحق الكارثة، مسألة حياة أو موت.

- خير يا باشا؟

- منسوب مياه النيل هينقص، وهنموت عطشانين.

• مش هسيب غسالة الهدوم تتشف، حتى لو الأمر تطلب مني
أتخانق مع البت سعاد الشغالة: أنتي بقى سبب أزمة الكهرباء
اللي احنا عايشين فيها؟

- لا والنعمة يا بيه ما ولعت النور..!

- ما أنت سايبه الغسالة تعصر بدالك وتتشف بدل حبل
الغسيل، حرام عليك يا شيخه خريت البلد.

• مش هسيب مراتي تنور أنوار البيت على الفاضي: إيه يا
مدام الأنوار دي كلها؟

- إيه في إيه!! أنت ماتعرفش إن فيه حاجة اسمها فن توزيع
الإضاءة؟!

- ماتعرفيش أنتي إن في حاجة اسمها شركة توزيع الكهرباء
بيتخرب بيتها.

• مش هستخدم ورق غير في أضيق الحدود، وعند الجراج
الرجل اللي واقف على الباب كان عايز يكتب لي وصل
الدخول.

- صرخت في وجهه: لا أرجوك، لا بلاش، أوعى تعمل كده.
- اندهش الرجل: في إيه يا باشا مالك هو أنا هعمل جاحة عيب ولا حرام؟ ده الوصل بتاعك مش عايزه؟!
- لا مش مسألة مش عايزه، بس مش عايزك تقطع ورقة.
- ليه خير؟ ما الورق كتير أهو؟
- ما هو قطع الورقة دي معناها قطع شجرة يعني الكون هيخسر شجرة جديدة وإحنا مش ناقصين..
- شجرة!!!... الكون!! «إيه العبيط ده» قالها في سره بس أنا سمعتها.. وعشان ياخدني على قد عقلي قال: طب وأنت شايف الحل إيه حضرتك دلوقتي؟
- خد إيدي أهيه اكتب على ظهرها.
- مش هموت ولا حشرة، أيوة عشان أحافظ على التوازن البيئي، يعني ليه بنحرم قتل الحيوانات وفي نفس الوقت نازلين قتل في النمل والصراصير والناموس والديبان، مش أرواح دي؟

خلاص من هنا ورايح مافيش مييدات حشرية هتدخل البيت،
وإن كان ولا بد هدور فقط على الأدوية التي تطرد الحشرات والفئران
دون أن تقتلهم.

ومن بعد ما نفذت الخطة ووضعت الأدوية الطاردة اللي طلعت
تقريباً فيتامينات أو منشطات... جيوش من الحشرات والفئران
والأبراص استوطنت منزلنا العامر، ولكن الحق يقال هم لم يعسكروا
داخل البيت بشكل دائم بل كانوا بيخرجوا يتفسحوا على راحتهم طول
اليوم ويرجعوا يباتوا عندنا آخر النهار.

ولكن لاحظت من بعد هذا القرار إن عدد الضيوف إلى بيتنا
المتواضع بدأ يتناقص ولا أعرف العلاقة، بس بخمن السبب من
الموقف اللي حصل مؤخراً لما تجمع عندنا بعض الأصدقاء وفجأة
دخلت «باكينام».

الجميع صرخ: برص برص.

وأنا بهدوء أشرح لهم: ماتخافوش يا جماعة دي «باكينام»... «ما
أنا بقيت بسميهم كل واحد باسم عشان اللخبطة».

فصاحت في وجهي صديقة تقول: ما تقتلها؟!!

حرام عليك يا شيخة هي عملت إيه بس؟!!

فتدخل صديق قائلاً: لا القتل مش حرام طالما كائنات مؤذية.

لا والله بقى البرص اللي لا بيهش ولا بينش بقى كائنات مؤذية

دلوقتي!!

رد عليّ وهو يجري نحو الباب يلحق بباقي الأصدقاء الذين فروا

هاربين قائلاً: أيوه طبعا اقتلهم بلا قرف.

طب بس وسع لأخوك عطوة، تحت رجلك أهوه.



obeikandi.com

غزل لا مؤاخذه البنات

لما تكتشف إن اللي اخترع ماكينة غزل البنات كان دكتور أسنان
تعرف إن مافيش حد بيعمل حاجة حلوة لوجه الله أبداً .

في يوم أخذت الواد ابني وخرجنا نلف شوية بالعربية، صحيح كنا
في عز الشتا والدنيا تلج بس هو كان قاعد في البيت بيزن ومش طايق
نفسه، مشينا شوية وأثناء رجوعنا شاهدت طفلاً صغيراً منكمشاً
على رصيف إحدى النواصي وبجواره عمود خشبي طويل مربوط فيه
أكياس تحتوي على غزل البنات .

الواد ابني بيعشق حاجة اسمها غزل البنات، توقفت بسيارتي
أمام الطفل وفتحت الشباك وسألته عن سعر الكيس فأجابني وهو
يفك واحداً منهم وعندما سألته: «إيه اللي موقفك في الجو ده! ما
تروح دلوقتي وتيجي تاني بكره» فأخبرني بأنه لن يستطيع أن يغادر
لبيته إلا بعد أن يبيع كل ما لديه من أكياس .

وقتها أخذت منه الكيس الذي فكه وطلبت منه أن يفك لي باقي
الأكياس كلها لأنني قررت له أن يغادر لبيته، ففرح بالخبر وفكهم
وجمعهم لي في كيس كبير وهو يشكرني متأثراً وفرحاً بمجيء موعد
الانصراف .

ورجعنا إلى البيت وتركت ابني في غرفته ومعه أكياس غزل البنات ثم توجهت لغرفة المعيشة وبعد مضي فترة من الوقت سمعت صوت المدام جاي من غرفة الواد ابني وهي تصرخ، وطبعاً استنتجت المشهد اللي شافته، أكيد دخلت على الواد لقيته فاتح كل أكياس غزل البنات وأكل الكمية كلها وغالباً كان لسه هيبدأ يمززمز في الأكياس البلاستيك نفسها .

وقبل أن أذهب إليهم وجدتها جاءت لي وهي تحمل في يدها بعض الأكياس وبملامح حادة تسألني:

- ممكن أفهم إيه اللي أنت عملته ده؟
- بابتسامه بلهاء جاوبتها: أشتريت غزل البنات.
- ومين هم البنات؟
- أفندم!!!
- ليه تشتري كل الكمية دي؟
- حسيت الواد غلبان وجعان، قلت أشتري..
- قاطعتني: مين قالك إنه جعان؟! ما أنا لسه مأكلاه قبل ما ينزل.

- لأ مش بتكلم عن ابنك، بتكلم عن الواد البياع.
- وابني زنبه إيه يأكل كم السكر ده كله مرة واحدة.
- أنا مش جاييهم لابنك أنا جاييهم..
- تقاطعني: أيوه أمال جاييهم لمين بقى؟؟؟
- أيوه ما أنا هقول أهوه: عشان الواد يروح من السقعة.
- وهو كان إيه اللي نزله أصلاً طالما سقعة.
- نازل يسترزق.
- مش بتكلم عن البياع، بتكلم عن ابنك.
- يا بنت الحلال نازل يتفسح.
- وطالما نازل يتفسح ليه ماتجبلوش غزل البنات؟
- ما هوه برضو هياكل منه.
- هياكل منه إزاي وأنت بتقول مش جاييهوله.
- لا ما الغرض الأساسي كان عشان الواد غلبان وسقعان.
- وعرفت منين إنه سقعان؟ أنا ملبساه تقيل.
- مش بتكلم عن ابنك، بتكلم عن الواد البياع.

• يعني برضو بتلف وتدور ومارديتش عليا..

• أرد على إيه؟

• مين هم البنات؟

•••

للأسف لقيت ركنة

أعتقد فيما أعتقد أن الوقت الذي استغرقته في حياتي بحثاً عن مكان للركن كان أكثر من الذي استغرقته بحثاً عن وظيفة والناس اللي لجأت لهم ليبحثوا لي عن مكان للركن كانوا أكثر من اللي لجأت لهم ليبحثوا لي عن عروسة..

وقد انتبهت لهذه الملاحظة في يوم كان عندي فيه اجتماع في الشغل ومستعجل جداً ومش فاضي «أبدأ بنفسي» وكان السؤال الذي يلح عليّ: هل ينفع أخذ أجازة النهاردة من كوني مثالي وأبدأ ثاني من بكرة؟

دون أن أفكر طويلاً اتخذت فعلاً هذا القرار أثناء ما كنت في الحمام استعداداً للنزول إلى الاجتماع وشايل هم الطريق والمرور خصوصاً وإنني استيقظت متأخراً والطريق زحمة كعادة يوم الاثنين.. لا والثلاثاء كمان والأربعاء والخميس طبعاً أه والأحد «كنت هنسأه» والجمعة بالليل والسبت أحياناً.

عموماً وصلت إلى عملي في ميعاد الاجتماع بالظبط ولكن قابلتني مشكلة بسيطة ألا وهي «مافيش مكان أركن» ووقفت بالسيارة أتلفت حولي لعلي أجد أي خرم أرمي فيه العربية بسرعة لم أجد.

وحيثما بدأ صراع ثقافات بداخلي، مجموعة بداخلي جايين أصحابهم ويؤيدون القرار الذي اتخذته في الحمام باعتبار اليوم مستثنى من فكرة «هدأ بنفسى» وعلى أساسه يقترحون أن أستسلم لرغبة السائس المتوحشة وأركن صف ثالث بشكل تقليدي.

وعلى الجانب الأخر مجموعة أخرى بداخلي عاملين مظاهرة ويرفعون شعار «ابدأ بنفسك» على أساس إن «الثورة مستمرة» وإنه عهد قد اتخذته على نفسى ولا يصح الرجوع فيه تحت أي مؤثرات حتى نستكمل مشوار التغيير.

وفي نهاية الأمر فاز مجموعة الثوار وأخذت برأيهم وتحركت بسيارتي على طول الطريق باحثاً عن مكان صف أول.

خلصت الشارع ولم أجد أي مكان، هل أستسلم؟ لا بل عاودت الكرة من جديد «وجيبت الشارع من أوله تاني» برضو مافيش مكان، طب ألف حول المبنى يمكن في الشوارع الخلفية أجد أي مكان وبالفعل بعد حوالي ربع قرن وجدت مكان لتوه قد خرجت سيارة منه فرشقت فيه فوراً.

صعدت جري إلى قاعة الاجتماعت فوجدت الاجتماع قد انتهى، وطبعاً المديرين بييموتوا في المواقف دي، ما يصدقوا يلاقوك عملت حاجة يطلعوا كل اللي في قلبهم، وأخذت اللي فيه النصيب من مديري مع الخصم المتين ثم نزلت في نهاية اليوم لأجد سيارتي قد حبست

بسيارة أخرى ركنت صف ثاني بجواري، مش بس كده لا ولقيت
عسكري المرور بيكلبش إحدى إطارات هذه السيارة.

● فتوجهت له قائلاً: أنا صاحب العربية اللي راكنة صف أول
ولو أنت كلبشت العربية دي أنا هتجسس معاها.

فلم يرد عسكري المرور على هذا الكلام واستمر فيما يقوم به.

● فعاودت الحديث إليه: طب ممكن أزق العربية ورا شوية
عشان أعرف أخرج وبعدين أنت تكلبشها براحتك؟

فلم يرد أيضاً حتى انتهى من عمله.

● فسألته: طب يعني هخرج إزاي أنا دلوقتي؟

● فرد أخيراً: معرفش والله دي أوامر... ثم تركني ومشى.

●●●

obeikandi.com

أنا أحب أله الزبالة قوي

بعد الجواز الرجالة ماتجيش غير بالعين الحمرا لكن قبل الجواز
الرجالة ماتجيش غير بالعين الزرقا .

وأنا دلوقتى في مرحلة ما بعد الجواز، وزوجتي دخلت من باب البيت
منفلة ومنزعجة وبتشخط وبتتطر بسبب منظر القمامة اللي على ناصية
شارعنا خصوصاً وإن حجمها قد زاد مع عدم التزام زبال المنطقة، وبعدها
كانت مقلب زبالة صغير أصبحت تقريباً خرابة كبيرة.

ولو إني ماليش علاقة بالموضوع ده إلا أنها رمت على كتفي المسؤولية
وفرضت عليّ حل هذه الأزمة بما إني عامل فيها مواطن مثالي.

فحاولت أن أهدئ من روعها وأشرح لها إنها تعتبر من المشاكل
العويصة التي تواجه الحكومة فكيف لي أنا أن أجد حلاً لها.. ردت
منفلة: لازم يلاقوا حل للناس اللي بترمي الزبالة في الشارع دي، لازم
يعدموهم.

- طب والناس مالها بس، زنبها إيه؟ مش لاقيين مكان يرموا
فيه زبالتهم.
- طب والحكومة دي بتعمل إيه؟ لازم الحكومة تتصرف.

• والحكومة بس هتلاحق على إيه ولا إيه؟ حرام عليكى ما هي برضو مشاكلها كتير.

• خلاص اتصرف أنت مش قولت هتبدأ بنفسك.. اتفضل حلها بقى ووريني المواطن المثالي اللي جواك هيتصرف إزاي؟؟!

• طيب اصبري بقى وشوفي عبقرية جوزك هاتعمل إيه؟؟

وقتها حسيت إنى اتزنقت ودبست نفسي، صحيح وأنا هعمل فيها إيه المشكلة دي؟.. هقف ناضورجي على ناصية الشارع أمنع كل واحد جايب زبالته! ولا أشيل أكياس الزباله على كتفي وأمشي بيها لغاية مقلب الزباله العمومي! ده إيه الزنقة الزباله اللي حطيت نفسي فيها دي.

ثم بعد تفكير طويل اهتديت للفكرة السليمة ونزلت اشترت صندوق قمامة كبير ووضعتهم أمام منزلنا ليكون تحت سيطرتي ووضعت عليه لافتة كبيرة كتبت عليها: «حفاظاً على نظافة شارعنا أرجو أن تضع كيس القمامة هنا».

مع مرور الأيام لاقت الفكرة نجاحاً عظيماً وأصبح كل الجيران يضعون زبالتهم داخل الصندوق وقد اختفت الخرابه على ناصية الشارع وسعدت جداً بعبقريتي صحيح كان منهم من يتكاسل عن

رفع غطاء صندوق القمامة ويرمى الكيس بجوار الصندوق إلا أن ذلك لم يعكر أجواء نجاحي وكنت أحمل أنا هذه الأكياس وأضعها بنفسى داخل الصندوق، وكدت أطيّر من الفرحة بهذا الإنجاز حتى أنى أصبحت أنقل مشاعري تلك لكل من يقابلنا من الجيران وأؤكد للجميع أن الأمل في إصلاح هذا المجتمع لازال موجوداً، كل ما علينا فقط هو أن يبدأ كل منا بنفسه.

ذلك حتى جاء اليوم المشؤوم يوم ماطلعتلوش لا شمس ولا قمر ولا صندوق زباله يوم ما تسرق الصندوق.. أيوه اتسرق.

صحيت من النوم وخرجت من منزلي وجدت صندوق الزباله اختفى وطبعاً الجيران اللي كانوا متعودين يرموا زبالتهم في هذا الصندوق لم يجدوه فرموا الزباله في نفس المكان إكوام إكوام قصاد باب بيتي.

وقتها اجتمعت فوراً ببعض الجيران واقترحت عليهم نلم من بعضنا ونجيب صندوق قمامة جديد «ما هو أنا مش نازل انتخابات عشان أصرف على الشارع كل شوية من جيبي، ده حتى اللي نازل انتخابات مش بيثيل الزباله بل بالعكس ده هو اللي بيلزق صوره على الحيطان»، وتوقعت موافقة الجيران على هذا الاقتراح بلا تردد خصوصاً بعد نجاح التجربة، إلا أنهم جميعاً نظروا لي بتهكم رافضين الفكرة وكأن لسان حالهم يقول «أنت عبيط يا جدع أنت ولا إيه؟»

ولما استفسرت عن سبب الرفض ضحك أحدهم ساخراً وقال:
ماهو هيتسرق تاني يا أستاذ.

وظل النقاش حتى خرجت المدام على صباحية ربنا ورأت أكوام
الزبالة أمام الباب، كنت أتوقع أنها ستغضب لهذا المنظر ولكني أعلم
أيضاً أنها ستتمالك أعصابها فهي طيبة القلب ورقيقة الطباع وفوق
كل ده بتحبني أوي.. وكنت لسه جاي أكلها لقيت العين الحمرا
ظهرت وبدأت تصرخ وتزعق في وشي وسط الشارع وقدام الناس: هو
ده تصرفك يا فالح!، نقلت الزبالة من على الناصية جبتها لي هنا قدام
البيت يا عبقرى يا فلانة زمانك.



ظروف عائلية واء الأزمة الاقتصادية

مصريتنا وطنيتنا حماها قاعد بيشد في شعره من ارتفاع الأسعار..

في الحقيقة الأسعار مؤخراً ولعت والدنيا بقيت نار مما جعلني بدأت أتابع باهتمام الأزمة الاقتصادية الطاحنة التي تمر بها البلد وحرصت على متابعة مؤشرات البورصة اللي مش فاهم منها أي حاجة واستمعت إلى آراء المحللين وخبراء الاقتصاد والكلام الكبير ده اللي يصعب على أمثالي فهمه، ولكن أدركت في النهاية حجم الأزمة الاقتصادية التي نمر بها، وقد تأثرت جداً بهذا الوضع الخطير.

وبينما كان الجميع يشكو من غلاء المعيشة وارتفاع الأسعار قررت ألا أنوح وأبكي مثلهم بل أبدأ بنفسي.

وبالفعل استدعيت المدام عندي في البيت وجلست معها جلسة اقتصادية ساعة عصرية وقلت لها:

- طبعاً أنت مقدره الوضع الخطير اللي إحنا فيه.
- خير.. هو الدكتور قالك حاجة عليا؟.. أنا كنت عارفة، من ساعة ما رجعنا من عنده وأنت لونك مخطوف.. قالك فاضلي قد إيه؟ قوللي الحقيقة؟؟

- يا بنتي اهدي شوية.. حقيقة إيه اللي مستنياها من دكتور تجميل.. أنا بكلمك عن وضع البلد.
- البلد!! ما هي زي الفل أهيه «وتركتني ومشيت».
- فذهبت وراءها للمطبخ.. لا البلد داخلة على مشكلة عويصة في الاقتصاد القومي ولازم احنا نساعدنا.
- بتعجب سألت: إحنا مين؟!
- قولت لها: أنا وأنت.
- نساعد مين؟
- البلد.. «ثم حاولت أشرح لها» أنت مش متابعة مؤشرات البورصة! الأسهم كل يوم في النازل ده غير مشكلة عجز الموازنة العامة للدولة.
- ترد عليّ وهي بتشوح السمنة: طب وإيه المطلوب؟
- نبطل نعمل زي المجتمع الاستهلاكي اللي إحنا عايشين فيه يعني نبطل نشترى الحاجات اللي مش محتاجين لها ونمنع نهائي شراء السلع المستوردة اللي ليها مثل محلي.
- تسحب السكين من الدرج وتقول: ربنا يسهل ويقدم اللي فيه الخير.

تركتها وأنا سعيد إنني نجحت في إقناعها وتوصلت معها بالمنطق والحجة إلى اتفاق نهائي وإرساء لقواعد جديدة تم وضعها للنظام الاقتصادي داخل منزلنا المتواضع، إلى أن جاء يوم السوبر ماركت.

وقد ذهبت معها لضمان سير الخطة الجديدة وانتظرتها عند الكاشير وقبل أن أتركها ذكرتها باتفاقنا وأن هذا كله من أجل وطننا الغالي وأنه واجبنا أن نساعد له ليعبر أزمته الاقتصادية.

وعندما جاء وقت الدفع بدأت أساعدها في إخراج السلع من الترولي للكاشير إلا إذا بي أفاجأ بتفاح أمريكي.. ضرب الدم في نفوخي وبوجه صارم وعصبية شديدة همست لها «عشان ما أفرجش الناس علينا» وقلت لها:

● أمريكي! ده الاتفاق اللي بينا؟! وكان ما له البلدي؟

● مش بحب البلدي.

● ليه ده حتى مسكر.. وإيه ده؟ كومبوت أناناس! طب كنتي

تدوري على كومبوت برتقال يمكن أرخص.. وترجعوا تزعلوا لما يرفعوا الدعم!

● ثم بعدها انفجرت في وجهها صارحاً عندما رأيت الفاجعة:

جبنة ريكفور، أنتي عايزة تجنيني!! ما فكرتيش في الحكومة هتواجه عجز الموازنة إزاي!

• ترد بصوت خافت: ده ريع كيلو بس ودي كلها مستلزمات البيت «تقولها وهي تتلفت في خجل من المتابعين للحوار بجوارنا».

• وإيه ده كمان يا هانم؟ أكل كلاب.. مايطفح هياكل فراخ، اشهدوا يا ناس، عشان تعرفوا حجم الدين الخارجي لمصر بيجي منين.. ما هو ده اللي بيرفع سعر الدولار.

وقد زاد عدد المتابعين للمشهد من حولنا ووقف الكاشير حائراً وخايف يسألني هل يحتسب السلع ويمررها على جهازه أم ينتظر لنهاية الموقف؟!

• بينما كنت أستكمل التفتيش انفجرت من جديد: بامبرز مستورد! يا دي المصيبة، أنت عارفة البامبرز ده معناه إيه؟

• بصوت خافت ردت والدموع في عينيها: معناه إيه؟

• معناه إن الأكل بيكلفنا وهو داخل وبيكلفنا وهو خارج... وبعدين ماله البامبرز المصري، عيبه إيه المصري؟ أنا نفسي أفهم..

• فتدخل سيده من ضمن المشاهدين.. معلىش يا خويا البامبرز المصري بيعمل حساسية.

• يعني إيه حساسية؟ ما يعمل حساسية.. خللي الواد يخشن شوية بلا دلح مرئ، مش أحسن من ارتفاع معدلات البطالة بسبب وقوف المصانع عن الإنتاج.

• عاودت التفتيش فأصابني هلع: كمان كافيارد.. وقتها جن جنوني وتركتها ومشيت وأنا أصرخ بعلو صوتي وسط المحل: أنتي واحدة مش وطنية ولا غيورة على اقتصاد بلدك، سعر الجنيه في النازل والديون في الطالع والاحتياطي النقدي بيتراجع، حرام عليكو خربتوا البلد.

طبعاً المدام مارجعتش البيت من ساعتها.. وبقيت وحيداً بالمنزل بلا ونيس ولا جليس ولا أكل ولا ترتيب ولا تنظيف ومع ذلك كنت مقتنعاً بأفكاري ومصراً عليها وعلى أنها السبيل الوحيد لزيادة الناتج المحلي الإجمالي.

ذلك حتى زارني بالمنزل والد زوجتي في محاولة منه للم شمل الأسرة من جديد وقد بدأ حديثه قائلاً:

• يا ابني عامل مشكلة على كيلو تفاح أمريكي أنا قولت البنث ظبطتك مع حريم أمريكي!!

• يا ريت يا أنكل.. قصدي يعني يا ريت حضرتك تفهمني إحنا بنمر بأزمة مالية وعلينا ديون متلتلة.

- واللّٰه يا ابني ما جابتي سيرة .. طب كنت تقوللي يا حبيبي وأنا أساعدك ده أنت زي ابني.
- مش أنا يا أنكل دي البلد هي اللي غرقانة في ديون عمالة تزيد والاحتياطي النقدي اللي عمال ينقص من خزينة الدولة.
- يا ابني خليك أنت في حالك والبلد ماتخفش عليها دي محروسة ليوم الدين.
- أيوه بس حضرتك مش معايا إن بنتك استفزازية.
- هي بصراحة استفزازية شوية يا ابني ليك حق طالعة لأمها، بس أنت عرفت إزاي؟
- ما هو يا أنكل عمالة تشتري سلع استفزازية.
- يا ابني معلىش فوت شوية.
- أفوت إزاي بس يا أنكل دي مراعتش إن فيه عجز في الموازنة العامة وضرائب جديدة هتفرض في حالة ارتفاع سعر الدولار، وطبعاً ده هيوّدي لحدوث خلل في ميزان المدفوعات وزيادة الأعباء على المجتمع بسبب ارتفاع أسعار السلع المستوردة ولو بصينا على مؤشر داو جونز...

- يقاطعني الرجل: يا ابني ماتقليش دماغي.. تعالى معايا خد مراتك وأنا هبقى أدفع لكم حق البامبرز المستورد يا سيدي.
- يا أنكل مش المشكلة مين فينا اللي يدفع، المشكلة إن احنا كده هنساهم في إضعاف قدرة المصانع المحلية على المنافسة الخارجية، وده هيوذي لمزيد من البطالة.
- يا ابني يا حبيبي اعقل بقى.. مش أنت اللي هتعدل الكون.. هاتيحي معايا تاخذ مراتك ولا أطلبلك حماتك على التلفزيون.
- فترة صمت.. صحيح البيت في حالة مزرية من غير المدام والراجل ريقه نشف معايا من غير ما أعزم عليه بكوباية مائة ساعة عشان البيت منفض، لكن مع ذلك أنا متمسك بموقفي ولن أتهاون في حق بلدي.. وهنا رأيته ينظر لشاشة الموبايل ثم كسر حالة الصمت قائلاً: خد كلم حماتك على التلفزيون.
- بلغت ريقي ثم خطفت التلفزيون من يده: ألووو.. أيوه يا طنط ده أنا كنت لسه بتحايل على أنكل نروح السوبر ماركت نجيب كل الطلبات اللي مراتي حبيبتي كانت عايزاها ونجيلكوا حالاً.



obeikandi.com

ساعدونى أنحرف

فِي يوم حسيت إن أدائي كمالك مش عاجبني، يعني لسه الشخص المثالي اللي جويا ماشي في نفس الطريق مع الناس مش عارف ينحرف، يومها كنت على وشك إنى أعلق لافتة على صدري مكتوب عليها «ساعدونى أنحرف ينوبكم ثواب».

تخوفاً من عواقب هذه الفكرة حاولت أن أكمل المسيرة معتمداً على نفسي وخرجت يومها من بيتنا مصمماً على أن أقدم أفضل ما لدي وأحصل في نهاية اليوم على بطولة العالم للمواطن الصالح. «بلا ستين خيبة».

أخذت سيارتي وقبل أن أتحرك بها نبهت على البواب بتاعنا ألا يحجز لي المكان ويتركه متاحاً لمن أراد الركن في أي وقت «مش بلطجة هي».

- فرد عليّ: حضرتك مسافر؟!
- لا راجع تاني بس اعمل زي ما بقولك.
- ماشي حاضر يا بيه.

وفي طريقي انتهت إلى أني باستخدامي للسيارة أستحوذ بمفردني على مكان كبير في الشوارع يكفي لعدد أكبر من الناس خصوصاً وإن الدنيا زحمة موت وده طبعاً بخلاف استهلاكي لبنزين يكفي لنقل عدد أكبر أيضاً من الناس فقررت فوراً أن أوقف هذه المهزلة وأركن السيارة وأركب أتوبيس هيئة نقل عام.

في الحقيقة لم أجد موقفاً خاصاً للأتوبيسات ده غير إني مش عارف أتوبيس كام بيروح فين، فركبت ميكروباص أسهل، ويا ريتني ماركبته ويا ريتني ما فكرت أبقي مثالي ولا بتاع «ما أنا كنت راكب في عربيتي باشا وبسمع فيروز».

سواق الميكروباص طلع من النوع الشقي مشغل ولاد سليم اللبانين «مفيش صاحب بيتصاحب، مفيش راجل بقى راجل، هنتعامل ويتعامل طلع سلاحك متكامل، هتعورني أعورك هنبوظلك منظرلك» ومع إيقاع الأغنية كان طائر في الشارع وإيده على الكلاكس... ولاحظت إن جميع من حولي يتشهد مستسلماً للقدر، وأدركت أن السائق من نوعية هؤلاء الذين ينتهي بهم المطاف سقوطاً من فوق الكباري أو غرقاً في قاع المياه، ووقتها تأكدت إن إحنا شعب بيموت في تراب بلده وبيموت برضو في ميته.

وانسحبت من لساني ووجهت كلامي للسائق: ما تخف السرعة شوية يا معلم وكفاية كلاكسات.

- معلش يا هندزة، ماشي من غير فرامل.

«يعني طابير في الشارع لا ملتزم بسرعة ولا بحارة ولا معاه فرامل ولا رابط الحزام وبيشرب شاي!!.. وفي آخر الشارع لجنة كل همها الرخص!»

قولت خلاص لما نوصل اللجنة هقول لهم على المهازل دي، ثم تراجع في الفكرة لأنني خفت ينتهي الموضوع على إنهم يسحبوا منه الشاي.

وفجأة تذكرت «أنا لما نزلت من العربية كان في إيدي كيس مناديل، استخدمت المنديل ورميت الكيس».

ولم أخذ وأدي مع نفسي كثيراً فبروح المواطن المثالي طلبت من السائق أن يتوقف فوراً وينزلني.. فاعتقد هو أنني أريد النزول خوفاً على عمري وبدأ يحاول إقناعي بأن الطريق ده لعبته وأنه ساعات بيمشيه وهو نايم.

وعندما أصريت على طلبي رد منفعلاً: ماشي أنزلك بس الأجرة هتدفعها كاملة.

- كل ده عشان الأجرة؟! على فكرة بقى أنت إنسان مادي أوي.
- رد منفعلاً: أنا مجدي؟! مجدي مين ده؟

بعد الجدل أنزلني أخيراً على جنب ورجعت الطريق كله حتى سيارتي على قدمي لكي أبحث عن كيس المناديل الذي رميته سهواً لألتقطه وأرميه في سلة المهملات «ضميري ما يسمحليش أبوظ الريحيم، أيوه النظام اللي مش غذائي اللي أنا ماشي عليه».

وكان أمامي طريق طويل أمشيه صادفني فيه شحات لم أتركه يتوسل طويلاً قبل أن أخرج له اللي فيه النصيب، وقتها التف حولي زملاء آخرين له «ماعرض كانوا مستخبين فين» ومع أجنحة الملاك اللي أنا لابسها لم أمتنع عن مساعدتهم «لغاية ما شطبوا عليّ»، وقبل أن يرحلوا لمحت أحدهم يصطحب طفلاً صغيراً وكان يرتعد برداً، فبالمره خلعت البلوفر اللي كنت لابسه وأعطيته له.

وقتها شعرت ببرد شديد «أنا إيه الهبل اللي أنا عملته ده!» المهم وصلت للسيارة وبحثت حتى وجدت كيس المناديل والتقطته من الأرض ونظرت حولي لكي أرميه في صندوق المهملات فلم أجد.. استسلمت ووضعته في جيبتي ولكن وقتها اكتشفت أن المنديل نفسه ليس موجوداً في جيبتي.. «يووو يبقى رميت المنديل كمان»، بدأت أبحث عن المنديل هو الآخر، ورحت أتلفت حولي بين المارة وأنظر تحت أقدامهم وبين أرجلهم حتى لمحني أحد المتسولين الذين التفوا حولي منذ قليل واقترب مني وسألني:

- بتدور على حاجة يا باشا؟
- لا أبدأ ده المنديل بتاعي بس وقع هنا .
- فبحث معي وهو يسأل: هو شكله إيه المنديل ده؟
- أبيض ومكرمش .
- شوية ويئس من البحث وسألني: هو المنديل ده كان فيه حاجة مهمة؟
- لا أبدأ.. «شوية أخلاق».
- فتقدم نحوي بمنديل مترب ومبهدل وقال لي هو ده؟
- قلت له: لأ أنا المنديل بتاعي كان بريجة .
- فحاول يقنعني: يا باشا هو ده مافيش غيره .
- ومن ياسي من إيجاد منديلي حبيبي أخذت هذا المنديل منه عقاباً لي على التهاون في حق شخصيتي المثالية .
- وبالطبع وضعته هو الآخر في جيبي وبدأت أجري في الشارع «مش عشان ألحق ميعادي لكن عشان أتدفي».
- وفي نهاية اليوم رجعت البيت وأنا عمال أعطس وفلوسي خالصانة وجيوب مليانة أكياس ومناديل وورق شوكولاتة وعلبة عصير فاضية

وعقب سيجارة مش عارف بتاع مين، وبالنسبة للعربية، هزأني البواب
بتاعنا بسببها عشان لما رجعت بيها ومالقيتش ركنة، سيبتاهله يركنها،
وساعتها اتفتح بعلو صوته في وسط الشارع وقعد يضرب كف على
كف ويقول: توب علينا يا رب.. مفيش مخ وعاملين بهوات.



العبد اللئيم بالله

أتخيل لو «علي بابا» كان يعيش في زمننا ده كانوا هيحولنا إنه فتح المغارة... لقي مكان يركن.

دخلت جراج السيارات الخاص بالمبنى الذي أعمل به وكنت سعيداً جداً لأن شخصيتي الجديدة منحنتي فرصة أن أذهب إلى عملي مبكراً وبالتالي أجد مكاناً للركن داخل الجراج ولأول مرة سأركن في أقرب مكان للمصعد.

وبعد ما ركنت وتمام التمام ومائة فل و١٧ أو ١٨ مش متأكد من الرقم، المهم شعرت وقتها بمنتهى الأنانية وحب الذات وتجاهل الآخرين وعدم تقدير لوقت العمل.. فأدرت محرك السيارة من جديد لأتحرك بها من هذا المكان لمكان آخر بعيداً عن المصعد لكي أترك المكان لشخص آخر يكون قد وصل متأخراً فيجد مكاناً قريباً يساعده على أن يلحق بميعاد العمل. «متقمص شخصية ملاك ملاك يعني مش أي كلام».

وبعدما قررت هذا القرار وقبل أن أتحرك بالسيارة صوت بداخلي صرخ قائلاً: أنت عبيط ولا شكلك كده؟

- رديت عليه: إيه يا عم مالك بس؟! اهدأ شوية أنت لسه خارج من السجن.
- أنت اتجننت خلاص؟ عارف يعني إيه تسبب مكان زي ده، الناس بتموت بعضها عشانه.
- أيوه بس أنا مش من الناس دي، أنا خلاص اتغيرت وانحرفت عن سلوكهم ده وبعمل حساب للأخرين في كل تصرفاتي وبراعي ال... .
- قاطعني مستهزئاً: تصرفات إيه يا أبو تصرفات، أنت بتسمي الهبل اللي أنت فيه ده تغيير، أنا سايبك بمزاجي لحد ما تزهق لكن توصل بيبك للدرجة دي يبقى لازم أمنعك.
- يعني إيه تمنعني، أنت إزاي تكلمني باللهجة دي؟ أنت مش عارف بتكلم مين!
- هتكون مين يعني؟ اطلع لي بره وأنا أوريك.. أنا قولت مش هتتحرك من هنا وهي كلمة واحدة.
- سيبيني، أنا بقيت إنسان راقى بيساعد مجتمعه، سيبيني بقولك.
- هيكلمني باللاوندي! يا جدع مجتمع إيه؟ أظفي الموتور ده واسمعني كويس.. أنت مش عارف الناس بتقول عليك إيه،

الناس معتبرينك مجنون واللي معتبرك عاقل عرف خلاص
إنك عبيط، يكون في معلومك لو نقلت العربية من هنا أنا
مش جاي معاك.

• أنا ما يهمنيش كلام الناس... وأنت هاتيحي معايا ورجلك
فوق رقبتك.

وانتصرت في النهاية في هذه المشادة الكلامية الجوانية ونقلت
السيارة بالفعل لأبعد مكان عن المصعد ثم توجهت لمكتبي وهناك
مضيت حضور قبل مواعي في مشهد من أهم مشاهد تاريخي
الحديث والمعاصر..

وبعد توقيت الحضور دخل إلى المكتب أحد الزملاء قائلاً: الحمد
لله مع إني وصلت متأخر بس من حظي لقيت مكان فاضي قدام
الأسانسير.

ولأني شعرت بأن مجهودي راح في الهواء، رديت عليه بمنتهى
التأثر: أيوه بس أنت متأخر أوي وراح عليك ميعاد الحضور.
رد قائلاً: عيب عليك، ما أنا ظبطت الواد بتاع كشف الحضور
بسيجارتين.

في سري قلت: يا خسارة المكان اللي راح على الفاضي، ده كده
كده مظبط نفسه.

وسأله أحد الزملاء: بس إزاي لقيت المكان ده فاضي؟

فرد عليه: بتاع الأمن بيقولني واحد زميل حضرتك ركن فيه
وبعدين سابه ومشى.

فرد جميع من كان بالمكتب كل بتعليقه: ده أكيد واحد أهبل.. لا
ده أكيد واحد أحول.. أو يمكن افكره مكان المدير وخاف يخصله
هههههه.. أو تلاقيه خاف يدفع على المكان ده فلوس زياده، ههههههه.

وظلوا هكذا في حالة الضحك والتريقة حتى انتبه أحدهم والتفت
لي قائلاً: أنت ساكت ليه؟

فاضطريت لأن أشاركهم التريقة قائلاً: لا بفكر في المعتوه ده..
أكيد ده واحد دماغه لاسعة وقالتله سيب المكان القريب لأي واحد
يجي متأخر.. بس خلاص هو أكيد مش هيكورها تاني.

فردت عليّ زميلة وهي تنظر لي بخبث من فوق نظارتها: وأنت
إيه اللي مخليك متأكد كده؟

وأمام الجميع نزلت فوراً الترجمة الحرفية لكلامها هذا: «عرفتك
يا أهبل».



كان نفسي أخدم

شاهدت شلة شباب يتحرشون بفتاة في الشارع، وأنا طبعاً مش هقف أتفرج.. هروح أتحرش معاها.

لا بالتأكيد قصدي هروح أمنعهم.. نفخت صدري وتوجهت نحوهم ثم للحظة انتبهت أنا هعمل إيه؟

وبدأت أتخيل السيناريو المتوقع، هروح أعمل سبع رجالة في بعض وأمنعهم: عيب كده يا كابتن منك له.

طبعاً هيكون الرد: مالكش دعوة أنت وخليك في حالك «مع دفعة في الكتف».

ومع نظرات الاستعطاف والاستتجاد من البنت هيغلي الدم في عروقي وسألجأ للعنف مع شلة الشباب ووقتها حتماً سأجد مطواه قد فتحت في وجهي وأحدهم يقول لي: نفض لنفسك يا كابتن.. ووقتها طبعاً مش هنفض عشان منظري أمام البنت ومنظري أمام الشخص المثالي اللي جوايا.

وبهذا الشكل سينتهي هذا السيناريو في أحد المكانين إما في المستشفى غرقان في دمي ويا يلحقوني يا مايلحقونيش أو في قسم

البوليس بعد القبض عليّ مع شلة الشباب واقتيادنا إلى البوكس ومنه للقسم وأترمي هناك في الحجز لغاية ما يبان لي صاحب.

ووقتها تراجعنا عن هذا السيناريو وفسيت صدري من تاني وبدأت أفكر في حل آخر للموقف.. وتوصلت إلى أن الحل الأسلم هو أن أتصل بالنجدة وبدأت أتخيل كيف سيكون السيناريو الجديد؟!

أتصل بالنجدة، جرس ومحدث بيرد... «معلش ماهو برضو وقت غداء» أعيد الاتصال مرة أخرى.. برضو محدش بيرد «طب يمكن عشان الماتش؟!» ثم انتبعت إلى أن الوضع سيكون صعباً جداً لو حد من بوليس النجدة رد على الهاتف وسألني عن المشكلة فقلت له: فيه شلة شباب بيعاكسوا واحدة بنت، وقتها أعتقد أن السيناريو سينتهي بأحد الأمرين إما ستغلق السكة في وجهي أو سيتم القبض عليّ أنا.

صرفت نظر عن هذا السيناريو هو الآخر وفكرت في حل جديد وتوصلت لفكرة بدت لي عبقرية للوهلة الأولى، سأذهب إلى شلة الشباب وأخبرهم بأن هذه البنت هي خطيبي مثلاً أو ابنة خالتي على أن يشعروا بالحرج وينصرفوا ولكن عندما أمعنت التفكير في هذه الخطة وجدت السيناريو قد يسير على نحو آخر.

عندما أقتحم شلة الشباب وأعلن أمامهم: البنت دي خطيبي وكل واحد منكم يروح لحاله دلوقتي حالاً.

قد تتفاجأ البنت بهذا التصرف ولها الحق وقتها أن تتخيل أنها
حركة جديدة من متحرش جديد يريد أن يستولى على الغنيمة لوحده.
فتتفض صارخة في وجهي: خطيبة مين يا عم أنت؟ هو أنا كنت
ناقصاك!

ووقتها ستكون النهاية لهذا السيناريو محكومة في مشهد واحد
يجمع البنت مع شلة الشباب والجميع ينهال عليّ بالضرب.



obeikandi.com

ملاك في مترو الأنفاق

خلال مشوارك بالسيارة وسط زحام القاهرة لابد وأن توفر احتياجاتك لفترة طويلة قادمة فلا تنسى زجاجة المياه وكيس الساندوتشات أو شوية فاكهة يعني كام واحدة يوسفى على صباعين موز، وانتبه للموبايل لازم يكون مشحون على الآخر، ونصيحة حاول أن تلبى نداء الطبيعة قبل ما تتزقنق في الزحمة ويفضل تاخذ معاك صور لأهلك وحبائك، صدقني هيوحشوك، وماتنساش ماكينة الحلاقة إذ ربما دقنك تطول في السكة.

وعندما قررت في محاولة جديدة أن أتخلى عن السيارة لأخفف ضغط الزحام الشديد عن شوارع القاهرة وأساهم في حل أزمة المواصلات وأحد من التلوث الناتج عن عادم السيارات وأقلل من الاستهلاك المحلي للوقود، توجهت إلى محطة مترو الأنفاق لكي أبدأ مشوار الذهاب إلى عملي من هذه النقطة.

وقطعت التذكرة غير معني بالزحام الشديد على شباك التذاكر و«بحاول أمثل إنه على قلبي زي العسل» ثم اتجهت إلى ماكينات التذاكر فوجدت بعضها لا يعمل وبدون ما أفكر في الحل لهذا الموقف كانت الإجابة تجوب من حولي فالجميع يقفز من فوق الماكينات بتلقائية شديدة وبلا تردد.

قبل أن أتبع هذا الأسلوب المعتمد وجدت أنه من دوري كملاك في بداية مشواره أن أبلغ المسؤولين في هذه المحطة حتى يلتفتوا لهذا الأمر ويتم تداركه وإصلاح الماكينات سريعاً، وبالفعل بحثت عن المسئول وأخبرته بالواقعة وأني وجدت الماكينة التي سأمر من خلالها لا تعمل، فضحك الرجل بشيء من الاستهزاء وقال: طب ما تنط يا بيه.

أوضحت له أنني لا أمانع ولكن رأيت أنه من الضروري أن أبلغكم كي يتم إصلاحها في أقرب وقت، فhez الرجل رأسه قائلاً: «أه، إن شاء الله» ثم عاد لالتهام قرص الطعمية الذي كان يحمله وتركني ومشى.

بعدها نزلت إلى رصيف القطارات مستخدماً السلم الكهربائي وأنا سعيد بأنه متوفر لدينا في محطات المترو وفخور به وأقف عليه ملتزماً بإرشاداته والتي تقول «الوقوف على الجانب الأيمن» وذلك لكي تتيح المجال لمن يريد النزول عليه سريعاً أن يستخدم الجانب الأيسر، وعاتب نفسي، طالما نملك مثل هذه الوسيلة الراقية في المواصلات وركابها غاية في التحضر وملتزمون بتعليماته والحفاظ عليه فلماذا كنت أستخدم سيارتي طول هذه الفترة الماضية.

وما إن انتهيت من هذا التفكير إلا وجاء شخص وقف بجواري على السلم، فتعجبت لهذا التصرف «حضرتك ده مش مكان الوقوف ده مكان للنزول السريع فقط» قلتها في سري لعله لم يلاحظ التعليمات «مايجراش حاجة».

بعدها جاء خلفي شخص خبط على كتفي قائلاً: بعد إذنك،
أعدي بس.

فالتفت له ثم أخبرته: حضرتك ده مكان الوقوف على السلم،
المرور السريع من على الشمال.

فرد عليّ الشخص الذي كان يقف على الشمال قائلاً: معلش
نستحمل بعض يا أستاذ.. «يعني ماتجيش غير منك أنت» قلتها
في سري ثم سمعت صوت شاب جاء من الخلف يقول بعلو صوته:
تعليمات إيه إحنا في مدرسة! ضحكت شلة كاملة من الشباب تقريباً
دول كانوا باقي المدرسة.

عموماً أفسحت المجال لهذا الشخص لكي يمر من اليمين ولكن
لم أجد لنفسني مكان لكي أقف ملتزماً باليمين من جديد نتيجة
الزحام والتدافع وعلقت يساراً، ولأن ضميري أنبني على التخلي عن
دوري الملائكي فطلبت من سيدة تقف أمامي في وسط السلم أن تتيح
لي المجال لكي أقف يميناً، فنظرت لي السيدة بتهكم: ياخويا ماتقف
مكان ما تقف أنت مانتاش شايف الزحمة اللي إحنا فيها.

وعند الرصيف وانتظاراً لوصول المترو التزمت الخط المرسوم
على الأرض الذي يفتح عنده باب المترو، ولكن عندما جاء المترو لم
يفتح أبوابه أمام هذا الخط، تركت الخط وجريت نحو الباب المكتوب

عليه صعود وجدته نزول.. وجدت الراكبين ينزلون منه، فتركته وتوجهت سريعاً لغيره وكان مكتوباً عليه نزول ولكن كان الجميع يصعد من خلاله فاشتركت معهم إلا أنني وجد في العمق أن الركاب نازلين من هذا الباب هو الآخر والأمر يعتمد على قوة الدفع وسياسة النفس الطويل مع بعض من الإصرار والعزيمة وتلك هي العناصر التي سترجح لمن الغلبة.

خرجت من وسط الزحام وقد قررت أن أنتظر القطار التالي، وقد تكرر نفس السيناريو مع القطار الجديد مع بعض من الخبرة السابقة والتي منحنتني الفرصة للصعود فعلياً إلى عربة المترو.

كان من حظي أن وجدت مكاناً أجلس به وسط هذا الزحام وبمجرد ما جلست رأيت أمّاً وابنها قد جلسا معي في عربة المترو ولكن لم يحظيا بمقعدين متجاورين وظلا يكملان الحديث فيما بينهما تارة بالصريخ بأعلى صوت وتارة بالإشارات، فبأخلاق الملائكة وقفت للابن ودعوته لكي يجلس بجوار أمه على أن أجلس أنا مكانه.

ورحب طبعاً الابن بالفكرة وبالفضل تركت له مقعدي وبمجرد ما وقف هو وقبل أن يترك مقعده كان شخص آخر قد جلس فيه، فابتسمت أنا لهذا الشخص فرد على هذه الابتسامة قائلاً: فيه حاجة؟



سيبوني في حالي

عندنا الإشاعة ممكن تلف البلد كلها قبل ما الحقيقة تفكر تلبس
هدومها وتخرج..

وعندي في الشغل نموذج مصغر لهذه النظرية، الإشاعات
والنميمة والرغي والهري شغالين عرض مستمر، بلا انقطاع وبكل
كفاءة، ولقد اتخذت عهداً على نفسي بالألا أشتكر في أي من هذه
الجرائم وأكون بعون الله مثال الموظف الملتزم الحريص على عمله
والمخلص لأداء واجبه والله على ما أقول شهيد.

ومن بعدها ركبت الأسانسير في الشغل ومعني عدد من الراكبين
وعندما وقف في أحد الأدوار وخرجت منه الفتاة التي كانت تقف معنا
بدأ الهري يأخذ مجراه...

- كف على كف من رجل في الخمسينات: أستغفر الله العظيم.
- يرد آخر: ما بقاش فيه حياء.. ربنا يهدي.
- يتدخل شاب في الثلاثينات: ويقولك التحرش بيزيد ليه،
ماهو من اللي بنشوفه.

• يعود الرجل الخمسيني ويقول: أكيد مالهاش أهل يربوها.

«يا جماعة حرام عليكم البنت عادية جداً وكانت واقفة زي الألف ما عملتش حاجة.. يلا أنا مالي؟ «أنا في حالي».

مع الزملاء داخل المكتب تمر زميلة عزيزة من أماننا وتخرج من باب المكتب فتبدأ التعليقات: صاحبتك النهاردة فاتحها على البحري «بغمزة بالعين اليمين».

يرد أحد الزملاء: بيقولوا فسخت خطوبتها.

يتدخل آخر: يبقى أكيد بترسم على الواد اللي جه جديد.

«يخرب بيوتكوا.. أوام فسختوا خطوبة البنت وكمان دخلتوا في نواياها، أشوف فيكوا يوم يا بعده، «لا عيب أنا موظف مثالي مش بعيب في حد ولا حتى في سري»، أنا مالي؟ أنا في حالي».

وفي خلال اليوم لا مانع من ترويج بعض شائعات سياسية على فنية على ما قسم:

• بيقولك أمريكا هتتدخل عسكرياً.

• لا يا عم ما تقدرش.. مؤكد روسيا عملت تحركات سرية.

• على فكرة بقى تركيا هي اللي ورا الموضوع ده.

«يا جبابرة، أنتوا بتجيبوا معلوماتكم السرية دي مينين؟!، ما أنا قاعد معاكم أهو في نفس الأوضة كل يوم، يا رب صبرني وعموماً أنا مالي؟ أنا في حالي».

وعلى الجانب الآخر الزميلات ماسكين في سيرة إحدى الفنانات «مالحقتش أسمع هي مين» وهاتك يا رغي: بيقولوا اتطلقت.

• ترد إحدى الزميلات: أيوه اطلقت واتجوزت واحد تاني أصغر منها.

• تدخل زميلة أخرى: مش عارفة، هي تقريباً لسه على ذمة جوزها بس اللي أنا متأكدة منه إنها نفخت «مع إشارة باليد نحو منطقة الصدر».

• تلاحقها الزميلة الأولى: لا بالعكس هي غالباً شدت.

• فتحسم الجدل زميلة رابعة: يا جماعة لا طبعاً لا شدت ولا نفخت، دي واضحة أوي يعني إنها شفطت.

«شردتوا البنية يا أرشانات منك لها، اللي زيكو مش هيورد على

جنة ولا على نار هتقفوا كده محتاسين في النص، يلا أنا مالي؟ أنا في حالي».

ثم أخيراً جاء نصيب المدير من التورثة دي اللي عمالة تتقسم من الصباح، ذلك بعد أن مر علينا وأعطى بعض التعليمات وبمجرد ما أنهى جولته أخذ نصيبه:

- هو طالع فيها كده ليه، مش كفاية إنه مرتشي!
- يرد زميل آخر: لا حرام عليك هو حرامي أه، بس مش مرتشي.
- ترد زميلة مخضرمة: اللي أنتوا ماتعرفهوش بقى إنه متجوز على مراته الأولانية.
- فيعلق زميل مخضرم أكثر منها: لا دي قديمة وبيقولوا كمان إن مراته الجديدة دي تبقى بنت عم رئيس مجلس الإدارة.
- «آه يا نافوخي، يعني أشق هدومي منكوا، يقولوا الولية اتجننت؟! أروح منكم فين؟ يلا أنا مالي؟ أنا في حالي».
- وفضلت كده في حالي لغاية ما حسوا كلهم إنني في حالي.. وقتها بدأوا يسألون: إيه السكوت المريب اللي أنت فيه ده؟
- لا أبداً...
- أنت تعبان؟

• لا أبداً أنا كويس.

• عيان؟

• لا أبداً والله أنا تمام...

وهروباً من الموقف عملت نفسي بتكلم في التليفون، وقتها شعرت بكلام بيتقال من تحت لتحت وهمسات رايحة جاية.. طرطأت وداني عشان أسمع اللي بيتقال بوضوح ويا ريتي ما طرطأت، زميل اكتشف إنني اتغيرت أوي عن زمان.

فيرد عليه زميل آخر: أيوه صح ده أكيد بيسمع مننا وينقل الكلام للمدير.

فترد زميلة: لا ده بيقولوا جاتله حالة نفسية وبيتعالج في مصحة.

فيتدخل زميل عزيز: مش حالة نفسية لا، ده شكله بيتعاطى حاجة، أكيد مدمن مخدرات.



obeikandi.com

فتشني فتش

بفرح أوي لما أي حد يشوفني يجري عليّ... إلا سايس العربيات.

ولذلك هروباً منه ألجأ للركن داخل الباركينج ولكن عند دخول الباركينج في المولات أو الفنادق مثلاً نمر جميعاً بإجراءات صارمة.. بطل الموتور وطلع رخصك وسلم نفسك واقفل بؤك وافتح الشنطة واوعى الكلب يعضك.

ماهو طبعاً لزوم الحماية والأمان، ولكن أي أمان هذا الذي يعتمد على رجل أمن اختصر مهام وظيفته في إغلاق شنطة سيارتك عندما تفتحها له.

أي أمان هذا الذي يعتمد على إرهابي مغفل يدرك تماماً أن إجراءات التأمين تكون مقصورة على تفتيش شنطة السيارة ومع ذلك يخبئ المتفجرات فيها.

أي أمان هذا الذي يعتمد على كلب مرهق يدور حول السيارة رغماً عنه وهو غير مهتم بالبحث عن أي شيء حتى ولو كان ورك فرخة.

وبناءً عليه قررت أن ألقت النظر لنظام التأمين الضعيف هذا وأبدأ بنفسى في محاولة تغييره لصالح المجتمع ككل، وبالفعل عندما كنت أقف بسيارتي أمام أبواب المول اللي جنب بيتنا طلب منى رجل الأمن أن أفتح له شنطة السيارة، فأخبرته: على فكرة أنا النهاردة مش حاطط القنبلة في الشنطة أنا حاطتها عندي هنا تحت الكرسي. فضحك الرجل مجاملة وأعاد عليّ طلبه بأن أفتح له شنطة السيارة.

فتحتها، مع العلم أن هناك شنطة تعتبر ضخمة موجودة داخل شنطة سيارتي ولكنها لم تثير فضوله حيث أغلق شنطة السيارة وأشار لي قائلاً: اتفضل.

لم أتفضل بل أخبرته: طب على فكرة بقى أنا حاطط القنابل كلها في الشنطة الكبيرة اللي أنت شوفتها جوة شنطة العربية.

ابتسم الرجل مجدداً وطلب منى أن أدخل سريعاً حتى لا أعطل الطابور خلفي.

وقتها نزلت من السيارة وبكل تحدٍ أخبرتهم: «أنا هتفتش يعني هتفتش» وطلبت مدير الأمن وكبرت الموضوع عن عمد «ما أنا أصلاً جاي مستعد» وجاء الرجل مدير الأمن مخضوضاً: خيراً!

- قلت له: حضرتك، أنا عايز أتفتش.
 - نظر لرجال الأمن وقال: ليه ماحصلش تفتيش هنا؟
 - تجمع رجال الأمن حولنا وردوا في نفس واحد: فتشناه يا فندم.
 - فالتفت لي مدير الأمن: طيب ما حضرتك تم تفتيشك أهو ومفيش حاجة، زعلان ليه؟ اتفضل بقى عشان الطابور.
 - لا مش هتفضل، اللي حصل ده اسمه تفتيش أي كلام وأنا لا أقبل أن حد يفتشني أي كلام.
 - أما حضرتك أمرك غريب!
 - أنا مش منقول من هنا غير لما تفتشوا العربية حته حته وإلا هعملكم مشكلة، أنتوا ماتعرفوش أنا مين.
- وتحت تأثير هذه اللهجة أمر مدير الأمن رجاله أن يفتشوا السيارة بدقة وبدأ يساعدهم هو الآخر حيث بحثوا تحت الكراسي وفتحوا كل أدرج التابلو ورفعوا غطاء الكابوت.. وقد تجمع حولي قائدي السيارات التي كانت في الطابور خلفي وهنأوني على هذه الروح وأنه فعلاً تصرف سليم لرفع مستوى التأمين والحفاظ على سلامتنا جميعاً، وطبعاً كنت سعيداً لتفهمهم.

وعندما انتهت عملية التفتيش ولم يجدوا شيئاً شكرتهم وأخبرتهم بأن هذا هو مستوى التأمين المطلوب وأرجو أن يحافظوا على هذا المستوى فيما بعد وإلا سيضطروني لاتخاذ إجراءات أبعد من ذلك.

وطمأنني مدير الأمن وأكد لي أنه قد استوعب فكرتي وسيحرص على تنفيذ نفس هذا الأداء فيما بعد، وانتهى الموقف وقد شعرت بفخر أنني استطعت أن أغير نمطاً غير سليم كان سائداً ويهدد أمن المجتمع.

وقد قررت أن أتابع نتيجة هذا التصرف بنفسني فكنت أذهب للمول وفي كل مرة عند المدخل أرى وعد الرجل لي يتحقق بالحرف حيث كانت تمر جميع السيارات سريعاً بأسلوب التفتيش التقليدي بينما تقف سيارتي بشكل استثنائي طويلاً ليتم تفتيشها حثة حثة.



بِاللَّهِ تَحَاوَلْتُ تَقْلِدُنِي

مفيش أحلي من يوم الخميس غير يوم قبض المرتب..

والنهاردة الخميس وبالصدفة لسه قابض المرتب وبالتالي أنا سعيد جداً بأن بكرة أجازة وأسعد بأن معايا فلوس، وبالإضافة لذلك متفائل أيضاً بالقرار اللي اتخذته مؤخراً بشأن إدارة صرف المرتب.

لقد قررت أن أدخر من مرتبي بداية من هذا الشهر الجديد، فلقد لاحظت أننا كمجتمع لا ندخر أبداً للغد ونصرف عمال على بطال وهذا سلوك استهلاكي متهور غير حكيم بل على الإنسان أن يحتاط ويعمل حساب المستقبل؛ لذلك قررت أن أغير هذا السلوك السائد وأنا على يقين بأن نجاحي في هذه الخطة سيحفز الجميع لاتخاذ نفس القرار.

ومن بداية الشهر بدأت أقتصد في كل نواحي الحياة على قد ما أقدر وأستبعد كل ما يمكن أن أعيش بدونه، ومع نهاية الشهر توصلت للنتيجة النهائية...

النتيجة التي طلعت بها من هذه التجربة تقول: يا سادة إحنا بنتمصص... ولو عايز تحتفظ بالبقية المتبقية من عقلك بلاش

تحاول تقلدني، ودي نصيحة من واحد غلط وحاول يحوش، واحد اكتشف إنه بيصرف في الشهر أضعاف اللي بيقبضه «مش عارف إزاي!» واحد كل علاقته بالمجتمع اللي عايش فيه مقتصرة على كلمة واحدة هات هات هات مافيش خد خالص...أو خد نفس وهات تاني.

واحد أصبحت فاتورة السوبر ماركت تحتاج منه أن يتمالك أعصابه لأنها تشكل خطراً حقيقياً على استقراره الأسري.

واحد بيصبح عليه بتاع الغاز كل أول شهر وفي كل مرة يقوله: «معلش ما هو أصل الغاز غلي».

واحد وصلت به حالة الرعب من محصل الكهرباء لدرجة إنه بقى يقلق لما أي حد يقوله: «منور».

واحد هيسيب الوردتين بتوعه يدبلوا ويموتوا لأن سعر مية الري بقت سبع أضعاف مية الشرب.

واحد بتطالبه الضريبة العقارية بأنه يدفع ضرائب على البيت اللي ساكن فيه على سبيل الاحتياط لغاية ما يثبت إنه عايش وبياكل ويشرب ويعمل بيبي جواه.

واحد بيرجع الموبايل للتوكيل عشان باظ في فترة الضمان يقولوا له: إنسى الضمان عشان ده سوء استخدام، ده وقع منك في ميه وأنت ماتعرفش.

واحد بيطلب صيانة التوكيل عشان يصلحوا له التلفزيون فيدفعوه
ضعف ثمن نفس التلفزيون بس الجديد بتاعه .

واحد بيروح يكشف على صوت في عربيته عند التوكيل يقولوا له:
لأ ده فيه خرم في العجلة ولازم تغير الكاوتش بواحد جديد .

واحد من كتر ما باظت أعصابه من انتظار رفع ثمن البنزين
لجأ لمبدأ بيدي لا بيد عمر وقرر يستخدم لسيارته بنزين غير مدعوم
بسعره المضاعف «وهو وقوع البلا ولا انتظاره» لعلها نظرية تساعده
على أن يبقى على قيد الحياة لما يغلوا البنزين.

واحد بيلف على المدارس عشان ابنه، يلاقي إن أرخص مكان
محترم يعلم فيه ابنه يحتاج منه أولاً إنه يبيع ابنه .



obeikandi.com

في المرور إرجع للتألاج

لا أذيع سرّاً إن قلت إن الوحيدة في الدنيا اللي بتسمع كلامي
من غير مناهدة يعني يمين يمين شمال شمال هي رفيقه الدرب...
عرييتي.

وعندما جاء موعد تجديد رخصتها، ذهبنا سوياً لوحدة المرور
من الصبح بدري وقررت أن أتخلى عن الاتصال بالمعارف والأصدقاء
لمساعدتي في إنهاء المهمة لأنني سأتعامل مع الإجراءات بالشكل
التقليدي، لا أريد محسوبة ولا واسطة ولا تخطي دور الآخرين
بالرشوة.

يعني إيه اللي هيحصل؟ هقف في طوابير شوية؟ مش مشكلة ياما
وقفت متدنب في الفصل، هغيب عن الشغل اليوم كله؟ معلش ما أنا
أصلاً مش مهم للدرجة دي، هتعامل معاملة ناشفة حبتين؟ عادي ما
ده الطبيعي في كل مكان إلا فنادق الخمس نجوم، المهم هو الحفاظ
على النظام وإرساء مبدأ المساواة، وتوكلت على الله ودعوته: «اللهم ما
قويني وانصرني وثبت عزيمتي».

وعندما وصلت لوحدة المرور وقبل أن أجد مكاناً لركن سيارتي التف حولي شباب فدائيون جداً يرمون أنفسهم أمام السيارة، ويصرون على أن أتركها لهم وسيتولون هم ركنها وعندما رفضت أرادوا أن يخدموني بأي شكل جزاهم الله كل خير: طب أنت جاي تخلص إيه يا باشا وأنا أخلصهولك «وطبعاً ده السيم اللي معناه قرشين زيادة لتخطي دور الآخرين».

رفضت جمايلهم: «معلش أنا جاي هنا النهاردة أتعلم أعتمد على نفسي»، وبالتالي أخذت كلمتين في جنابي عملت نفسي ما سمعتهمش وركنت سيارتي في جراج مخصص لوحدة المرور.

وعندما دخلت الوحدة بحثت عن لافتة توضح ترتيب الإجراءات التي يجب أن أقوم بها لتجديد الرخصة فلم أجد أو خيلنا واقعيين هي اللافتة موجودة ولكن أكلها الصداً.

وقبل أن أفكر أسأل، حاصرني بعض الأشخاص الخدومين جداً الحقيقة، سألوني بكل اهتمام: هتعمل إيه يا بيه؟ قبل أن أنطق، يبادر أحدهم لو تجديد رخصة هات أخلصهالك، فيقاطعه آخر وهات أنا أخلصك المخالفات، بينما ثالثهما يقنعني بالفكرة: هات يا بيه وخليك مستريح.

لا شكراً أنا هتصرف، «قويني يا رب»، وذهبت لشباك النياية
عشان المخالفات لقيت طابور لا يتحرك وطابور تاني من جوه الشباك
هو اللي بيتحرك، عموماً قبل أن أضيع وقتاً طويلاً أمام هذا الشباك
دلوني ولاد الحلال على إني لا بد وأن أصور الرخصة والبطاقة ثلاث
صور أولاً.

ذهبت لطابور التصوير هناك قالوا لي: روح اشترى الشنطة من
عند الأستاذ مرتضى، قلبت عليه المكان كله مالقيتهوش بس لاقيت
بداله مدام تهاني عشان تديني شنطة ثمنها لا يعبر إطلاقاً على أنها
شنطة بامبة متهربة.. «طب حضرتك مافيش ألوان تانية؟».

ذهبت بعدها لطابور آخر استطعت من خلاله أن أنشئ علاقات
صداقة مع زميلي اللي واقفين معايا في الطابور حتى حصلت في نهايته
على نموذج الفحص، لكن قبل أن أذهب للفحص قالوا لي اشترى
طفاية ووقتها نط في وشي واحد بيقولي: هات وأنا أشتريها لك...
«صبرني يا رب».

ثم جاءت مرحلة أخذ البصمة من الموتور وهنا أخبرني المسؤل
أن نوع سيارتي بالتحديد صعب جداً الوصل فيها للبصمة، وهو واحد
بس اللي بيعرف يطلعها وموجود في وحدة مرور أخرى.

انتهى اليوم بصدمة ولكني لازلت متمسكاً بمبدئي وذهبت في اليوم التالي لوحدة المرور الأخرى التي يوجد بها هذا الشخص الفريد من نوعه لكي يستخرج بصمة الموتور من سيارتي وسريعاً رجعت لوحدة المرور التي أتبعها.

واستكمالاً لإجراءات الفحص ذهبت للمهندس الميكانيكي اللي شاهده يمشي لوحده على ورق عربيته دون أن يتحرك حتى من مقعده ليكشف على السيارة وذلك بعد ما أخذ اللي فيه النصيب على الملأ «لم أكن أتجسس».

بعدها جاء دوري فأعطيته أوراقى فنظر لي مبتسماً ومنتظراً، صدرت له ملامحاً تقول: «أنا ساذج في قلب نفسي مش بفهم الحاجات دي».. مما جعله يضطر لأن يتحرك من مكانه ويذهب للسيارة وهناك أخبرني برفضه الإمضاء على الأوراق بحجة «أنت مركب أنوار زينون، روح شيلها وتعالى» يا عم يهديك يرضيك هي العربية نازلة كده.

كلمة مني على كلمة منه تجمع حولنا الشعب كله اللي كان في منطقة الفحص، وأنا أحاول أقنعه إن العربية جاءت من بلدها كده والناس بتحاول تقنعني إنى أدفع له قرشين هيمشيها.. وأنا طبعا عندي مبدأ مبهدلني معاه، ومش عارف إيه اللي أنا عامله في نفسي ده!

عموماً انتهى الموقف بعد ما الرجل ربنا هداه أو زهق مني ومضى لي على الورق.

رحت بعدها على شباك النيابة عشان بيان المخالفات، طلع لي مخالفات التحدث في المحمول، كنت هتجنن ووقفت أشد في شعري والناس تقولي ادفع وأمرك لله وأنا أقول لهم يا إخوانا العربية فيها «بلو توث» مش بستخدم المحمول، المهم دفعت تفادياً لضياح مزيد من الوقت.

وذهبت للشباك الخاص باستلام نتيجة الفحص قال لي الموظف: فين وثيقة التأمين؟ ودي أجيبها منين دي يا سعادة البيه؟ روح اسأل على أكشاك التأمين الإجباري.

دورت أسأل فين أكشاك التأمين.. والإجابة كانت هات يا باشا وخليك مستريح.. «يا رب ثبتتي خصوصاً وإني بدأت أيأس».

وصلت أخيراً واستلمت الورقة وأضفتها لنموذج الفحص البيئي وبيان شهادة المخالفات وشهادة صلاحية جهاز الإطفاء وصورة باسبور ابن خالتي وقسيمة طلاق بنت الجيران.

ثم توجهت لشباك الخزينة عشان أدفع وأروح... لقيت موظف الخزنة قافل الشباك، «لا مش عشان وقته انتهى» لكن عشان يآدب

الناس، اتخفق من زحمة الجماهير وعدم انتظامهم فقفل في وشهم الشباك، «رجل لذيذ قوي، طب بس أنا ذنبي إيه؟»

فضلت مستتية مع باقي الجماهير اللي لم يكتفِ بعضهم بالانتظار بل بدأوا يتوسلون له وهو مقموص وواحد على خاطره وظل الحال على ما هو عليه لغاية ما جاء ميعاد نهاية العمل بالفعل وترك موظف الخزنة مكانه وانصرف رسمي.

وهذا ما اضطرني للذهاب من جديد في اليوم التالي لوحدة المرور لاستكمال المسألة، يوم ثالث أترك فيه شغلي وبيتي وحالي ومحتالي واللي ورايا واللي قدامي وأذهب فيه لأنهي إجراءات تجديد رخصة الهانم عربيتي اللي كرهتها.

تجمع البلطجية في المرور أكثر من تجمعهم في أي خناقة، والمناهدة مع كل واحد عايز الشاي بتاعه تحرق دم أي حد حتى لو معندوش دم، والوقت اللي بيضيع من الطوابير اللي بتمشي من الجنب بس كيفيك عشان تعجز وتكرمش وأنت واقف، والتجربة ككل تجعل أي واحد عايز يتفلسف وينحرف ويبدأ بنفسه، يصرف نظر ويعود سالمًا للكتالوج اللي ماشيين عليه كلنا.



سلامات كده

اللي قال كتر السلام يقل المعرفة ده كان واحد بيملكك...

والحقيقة إن شكل السلام هو اللي ممكن يقل المعرفة، فلقد لاحظت فيما يخص العلاقات الإنسانية بين المصريين إن السلامات عندنا تأدية واجب، نحن لا نعطي السلام أو التحية فيما بيننا الكثير من الاهتمام، فالطبيعي عندما تصافح شخصاً أن تمنحه كل تركيزك وتشعره بحماسك للاطمئنان عليه وتتقل له إحساسك بالمودة تجاهه والسعادة لرؤيته وأولى العلامات التي تساعدك في تحقيق أسلوب التحية السليم هو أن تقف لمن تسلم عليه وتتنظر إلى عينيه وقت التحية وتناديه باسمه وتبتسم له وما إلى ذلك.

ولكن عندنا تشعر أن السلام أو المصافحة مجرد تحصيل حاصل، لا ينم عن أي ود حقيقي بين الطرفين ولكن بما إني هبدأ بنفسي فقد قررت أن أغير هذه الأنماط السائدة من السلامات وأقدم النموذج السليم لكل من أسلم عليه حتى تنتقل عدوى السلام اللي طالع من القلب للجميع ولكن جاءت النتيجة بما لا تشتهي السفن...

● أحياناً تسلّم على شخص تلاقيه سايبك إيدّه على الآخر، وهي عبارة عن حاجة مظفلطة وطرية... وقتها تحس إنك مسكت برص.

● وساعات تسلّم على واحد بجميمية تلاقيه مدلك «مولة سرير».. دراع مفرود على آخره ناشف وصلب عشان تتعلم بعد كده تحفظ المراتب.

● وأحياناً تسلّم على واحدة بنت تحس إنك مسكت إيد مقشّة.. وده عادة لما تكون البنت رفيعة أوي ومش بترضى تمسك إيد راجل، فتمد كف يدها لك مفرود ومتخشب.

● وعلى العكس أحياناً تسلّم على واحد كل همه يثبت لك إنه بيقلل أجهزة الجيم، يقوم ماسك إيدك عاصرها ثم يبدأ ينفذ في دراعك لغاية ما يخلعه «يا أبو الكباتن ده سلام هي خناقة!».

● أوقات أخرى تصافح شخص معرفتك به سطحية فيتشعبط في رقبته وهاتك يا بوس.. «يا عم سيب، دقنك بتشوك».

● أحياناً تسلّم على شخص يخيل لك إنه موجود معانا في الدنيا ثم تكتشف إنه مش موجود.. فالطبيعي عندما تصافح أحد

ينظر لك فتبتسم له وهكذا، لكن في هذه الحالة تفاجأ بأنك تسلم على كف بني آدم فقط لا غير... الباقي مش موجود.. مشغول بيكلّم حد تاني ومدريك ظهره.

• وساعات ناس تيجي تسلم عليهم يقوموا دلقين عليك جردل فيه ساقع خصوصاً لما تكون واحدة بنت وتقولك: معلى مش بسلم، أو واحد تاني تيجي تسلم عليه يقوم لاوي إيدو ومدريك الساعة تسلم عليها بحجة إن إيدو مبلولة.

• أوقات تسلم على شخص يمرمطك معاه.. تسلم بحسن نية على أساس هيسلم ويسيبك لحال سبيلك، تلاقيه سلم عليك وأخذك معاه ومشى.. «طب سيب إيدي يا سيدنا البيه مايصحش كده، طب راعي كلام الناس طه»، شوية وتلاقيه شدك على جنب عشان الناس تعدي وبعدين رجعت مارشيدير عشان يعزمك في مكتبه وبعدين يضغط على إيدك لتحت عشان تقعد وبعدين يشدها تاني: «لأ تعالى على الكرسي ده أريحلك»، طب تحب أسبهاالك وأجي أخذها آخر النهار أريحلك أنت؟!

• زي واحد تاني تيجي تسلم عليه تلاقيه مسك إيدك بإيديه الاتنين وضم المجموعة كلها لصدرو وهذا النوع يتعمد أن

يقترّب منك أثناء الحديث لدرجة إن نفسه يخبط في وشك..
«طب ابعّد شوية أنا ما بحبش ريحة البصل».

• ساعات تيجي تسلّم على حد ماتلاقيش حاجة تمسكها، أه والله زمبؤلك كده، لأنه يتعمد أن يضرب كف يدك سريعاً ويهرب تيجي تمسك أنت حاجة كسلام طبيعي زي بتاع النبي آدمين متلاقيش.

• بخلاف تلك التي تحمل لك ذكريات قديمة عندما تسلّم عليك تترك يدها في يدك وتواصل الحديث: «يا بنت الحلال اسحبي إيدك يخرب بيتك هنروح في داهية كلنا».

عموماً مش مهم أوي شكل السلام المهم إنه يكون دائماً موجود بينا.



فيسبوكنا كلنا

مع إن الفيسبوك زي السجن .. واحد قاعد لوحده ويخلق لنفسه عالم افتراضي وعمال يكتب على الحيطه، إلا إنه له فضل كبير علينا، من وقت ما انتشر والكتابة قلت من على أبواب الحمامات.

في يوم فتحت الفيس بوك ولسه هبدأ أعلق وأتريق وأتخايق فجأة افكرت! ده أنا شخص مثالي، أوباللا .. أنا إيه اللي أنا عملته في نفسي ده؟ يعني إيه! يعني خلاص مش هارد مش هدافع مش ههاجم، هأفضل واقف كده «أوف سايد!» .. إزاي الكلام ده! طب هعمل إيه في الناس المستنزة سياسياً، طب وبالنسبة للعيال المتعصبه رياضياً، طب والجماعة اللي بيروجوا إشاعات يومياً ..

طب ممكن أستثني الفيس بوك من موضوع «هبدأ بنفسي» ده، طب ممكن حد ثاني يبدأ بدالي؟

أمري لله هحاول أمسك نفسي وأسيطر على أعصابي ماهو مقلب ولازم أشربه للأخر ولو إني فعلاً مش عارف هعمل إيه مع الناس دي!!؟

• يعني لما واحدة يكون دراعها متجسس، يا ستي ألف سلامة عليكى وتنمنى لك الشفاء العاجل وإن شاء الله عدوينك... لكن ليه تحط لنا صورة إيدك على الفيس؟! هاه ليه؟ يعني إحنا هنكذبك مثلاً، حد هيقولك هاتي ما يثبت بإمضاء اثنين شهود؟ يعني ليه تحطي لنا صورة إيد متجسبة وكمان المانيكير متقشر؟! وما بالك بقى لما تكون الرجل هي اللي مكسورة، مش هحكى عنها كثير بس ذنبي إيه إنى أفتح الفيس ألقى صوابع رجلين في وشي؟

• اللي بتعمل طبخة وتصورها وتحطها ع الفيس... وتكتب اتفضلوا! سايق عليك النبي يا شيخة قبل ما تصوري الأكل اتعلمي الطبخ الأول، أفضّل إيه والصلصة بتشر منها وغرقانة زيت ووشها محروق!

• طيب الأخت اللي بتاخذ الفرابتشينو بتاعها في الكافيه... حضرتك بالهنا والشفا تقدرى تستمتعي بيه مع نفسك على فكرة، مش لازم تصوري الماچ وتفرجينا الرغاوي... وإزاي هتقدرى تشربيه بعد ما كل الناس بصيتلك فيه؟

• الشاب الكول بتاع: «أعتذر عن قبول صداقات جديدة لأنى وصلت للحد الأقصى لتلقى الصداقات ٥٠٠٠ صديق»...

ربنا يزيد ويبارك يا سيدي لكن الرسالة وصلت على فكرة ومفقوسة أوي... حضرتك كل همك إنك توصل لنا إن شعبيتك طاغية وإنك واد جامد ومخلص ووصلت للحد الأقصى لعدد الأصدقاء لأ وإيه لسه بيبعثولك وأنت يا حرام مش قادر تستجيب، كنت ممكن تجيبها على بلاطة وتكتب «أنا واد خطير» كده على طول من غير لف ودوران.

● البنوتة العسولة بقى بتاعة: «مش برد ع الخاص».. طيب ما ترديش مش مستهلة إعلان... بس تخيلي أنا مش عارف ليه حاسس إن مافيش حد بعثلك حاجة ع الخاص.

● «أنا مريض جداً ادعولي» على فكرة مش عشان حضرتك عندك شوية صداع تصدعنا معاك.

● ورجاء خاص للجماعة اللي بيقحمونا بالعافية في جروبات مالناش بيها أي صلة أحب على أيديكم وإلهي تتجوزوا وتتولوا اللي في بالكم يا قادر يا كريم ارحمونا من الموضوع ده، أنا لو عايز أشترك في جروب أنا بعرف أشترك لوحدي واللّه. وبعدين يعني إن كان ضروري ولا بد تعزموا علينا، راعوا شوية مدى توافق كل شخص مع الجروب اللي هتقمحوه فيه، يعني أنا مثلاً مالي ومال جروب «أحلى طرحة عربية»

مالي أنا، ها؟ ولا جروب «محيي الشاعرة هناء» مين هناء؟
وبعدين لما تدخلوني في جروب اسمه «تعارف وصدائة» طب
يعني أنا ناقص مشاكل مع المدام! مش نراعي أحوال بعض
الاجتماعية شوية؟! ... أه وقبل ما أنسى بالمرة بقى اللي
بيلعبوا كاندي كراش قسماً عظماً ما حدش غيركم عايز يلعب
اللعبة دي فبطلوا تبعتلونا دعوة، ارحموووونا.

• ده غير اللي واخدها جد أوي ومش بيضهم الهزار.. يلاقي
واحد بينكت يرد عليه ويحلل ويناقدش ويدعوه للحكمة
والموعظة ويدخل في الأصول والتقاليد ويطلع منها ع الوطنية
والقومية العربية والتاني لو رد عليه تقلب بخناقة وشتايم
والناس بتسلك في النص.

• الناس بقى اللي لا بتهش ولا بتتش وبتربي ع الفيس عداوة،
اللي بيدخلوا يتجسسوا من غير مايسيبيوا أي أثر «ولا لايك
ولا كومنت» داخلين بس عشان يشوفوا «سها» حاطة صورتها
من غير حجاب ويروحوا يقولوا لبقية العيلة ويعرفوا محمد
مصاحب مين على الفيس من ورا خطيبته... طبعا أنتم
مبسطويين إن محدش شايفكم لكن أحب أقولكم إن احنا
بنحس بيكم.. وخليكم كده عايشين في دور البرص.

- الأخ اللي اسمه «أمير العشاق» والأخت اللي اسمها «أنا القطة سمسة» عندي لكم سؤال: هو في حاجة في اسمكم الحقيقي عيب أو حرام؟ معلى صارحوني أنا زي أخوكم.
- أصحاب الصور الfake هو أنتم بتتكلّموا جد ولا بتهزروا؟ يعني اللي بتحط صورة أنجلينا جولي وفاكرانا هنتلخبط واللي بتحط السلطانة هويام على إنها هي أيام زمان واللي بيحط أحمد السقا بالفانلة السودا الحملات طب يعني غير الفانلة! طب بلاش، نيحي لصور المناظر الطبيعية بتاعة الوردة اللي بتخر دم والشمعة اللي بتعيط هو أنتم مش حاطين صوركم ليه، مكسوفين؟ طب بتمشوا في الشارع إزاي؟ على فكرة يا جماعة ده اسمه فيس بوك وعلى فكرة برضو فيس بالإنجليزي يعني وجه بمعنى آخر وش حضرتك.
- طيب نيحي للي غاوي ينزل أدعية وإرشادات دينية... جزاك الله كل خير يا سيدي لكن حضرتك مش لاقى مكان تاني تاخذ فيه ثواب غير ع الفيس؟! وبعدين بالشكل ده بتحسنا إنك بتخاطب أهل قريش وإحنا والنبي غلابة يعني حضرتك بتعاملنا كما لو كنا كفار طالما بنكتب في مواضيع تانية، فهل ممكن تعاملنا على إننا مؤمنين بالله عادي بس بنهزر شوية؟ لو أمكن يعني.

obeikandi.com

اتبعت عشاه صدقت

الآن لا يسعني إلا أن أعلن أمام الجميع إنني حتى في الانحراف فشلت، لا ومش بس كدة، ده أنا كمان اتبهدلت واتبعزت واتمرمطت واتشقلت وكل ده عشان صدقت، صدقت إنني ممكن أعدل المائلة لوحدي لو بدأت بنفسني لكن مع الأسف المائلة لما جيت أعدلها وقعت على نافوخي، وده ليه؟

لأننا في مجتمع مش عايزينحرف، ماشي في السكة الغلط وطايفي النور ومضيع الخريطة في طريق بدون إرشادات ولا خدمات وعمال يطلع من مطب ينزل في حفرة والبنزين بيخلص ومش مصدق إنه تايه. نحن في مجتمع من أكثر مجتمعات العالم استهلاكًا للجرائد... في تلميع الزجاج.

نحن في مجتمع بيتسم لبعضه... فقط من أجل البقشيش. نحن في مجتمع يقدر المعلم... فقط داخل لجنة الامتحان. نحن في مجتمع مشغول بتفسير الأحلام... عن تفسير الأحاديث. نحن في مجتمع يعشق تراب البلد... لدرجة إنه مش بيرضى يمسه.

نحن في مجتمع يحفظ لسانه... وستأكد بنفسك إذا مشيت في الشارع سادد أذنيك بشكل محكم.

نحن في مجتمع قرر يلغي عقله... ويلاعب طاولة على القهوة وبطل يلعب شطرنج.

نحن في مجتمع يحترم خصوصية الآخرين... لكن إوعى تسلم موبايلك لصاحبك لأنه هيقلب فيه.

نحن في مجتمع يؤمن بدور العلم والعلماء... لكن هذا لا يمنع إنك تسأل مجرب ولا تسأل طبيب.

نحن في مجتمع يقدر أهمية الوقت بل وتوصل إلى أنه أعلى من أرواح البشر... فطبق النظرية في الشوارع وهو يقود سيارته.

نحن في مجتمع يرى الإسلام في خلع علامة شيفروليه من العربية... لأنها تشبه الصليب.

نحن في مجتمع يراعي الملكية العامة... لكن بالذوق بالعافية مش هتركن مكاني.

نحن في مجتمع مغرم بالجنس الناعم... لدرجة إنه لا يفوت فرصة لكي يعبر فيها عن مشاعره.

نحن في مجتمع يهتم بدور المرأة... فقط وقت الانتخابات.

نحن في مجتمع يعطي لرموزه كامل قيمتهم... فقط بعد وفاتهم.

نحن في مجتمع لا يراف بالضحية... حتى في العيد الكبير.

نحن في مجتمع يرفض العنصرية... بس مرة واحد صعيدي

وغيره واحد كويس أوي بس مسيحي وناس وولاد ناس وغيرهم عيال

بيئة.

ولم تكن تلك الخصائص الفريدة التي حظي بها هذا المجتمع

للتحقق بمحض الصدفة بل هي نتاج لفكر وثقافة ومبادئ ووعي

وأخلاق وحاجات تانية كتير سادت بين أبناء هذا المجتمع والتي أدت

في النهاية إلى انهيار مشروع الملاك الذي كنت نويت تأسيسه ولو

كنت تشك في أن العيب فيّ أنا، اتفضل حضرتك الجناحات بالريش

بتاعها وأتحداك تعمل ملاك، لأنك لو حاولت تتحرف عن الخط اللي

المجتمع ماشي فيه وقررت تكون مثالي وتبدأ بنفسك هتكتشف إنك

في بلدنا دي «تعمل ملاك تاخذ على قفاك».



obeikandi.com

الصفحة

الفهرس

- ٥ الحكاية من أولها:
- ٩ التكشير في الوش مافيهوش معلش:
- ١٣ البوفيه المفتوح ع الآخر:
- ١٩ وطلعت عيبط:
- ٢٣ تضامناً مع سطوحي:
- ٢٧ معاناة درجة أولى:
- ٣١ أنا أستاهل اللي يجرى لي:
- ٣٥ ظبطت ساعتى ... متلبسة:
- ٣٩ الشيشة بالحجارة في قلب العمارة:
- ٤٥ حيران محتار متلخبط:
- ٤٩ زنقة ع الهوا:
- ٥٣ أسف على كلمة أسف:
- ٥٧ المضطر يركب العجلة:

- ٦٣ عديني شكراً:
- ٦٧ في السينما كل فشار:
- ٧١ دخول الحمام مع سبق الإصرار والترصد:
- ٧٥ في الجيم ماتغلطش غلطتي:
- ٧٩ شرم الشيخ وضع ثاني:
- ٨٣ أنا بيئة وأحب البيئة:
- ٨٩ غزل لا مؤاخذه البنات:
- ٩٣ للأسف لقيت ركنة:
- ٩٧ أنا أحب ألم الزبالة قوي:
- ١٠١ ظروف عائلية وراء الأزمة الاقتصادية:
- ١٠٩ ساعدوني أنحرف:
- ١١٥ الهبل اللي بيشر:
- ١١٩ كان نفسي أخدم:
- ١٢٣ ملاك في مترو الأنفاق:

- ١٢٧ سيبوني في حالي:
- ١٣٣ فتشني فتش:
- ١٣٧ بلاش تحاول تقلدني:
- ١٤١ في المرور إرجع للكتالوج:
- ١٤٧ سلامات كده:
- ١٥١ فيسبوكونا كلنا:
- ١٥٧ اتبعزقت عشان صدقت:

حقوق الطبع محفوظة للناشر



أطلس

للتشر والإنتاج الإعلامي

يحظر نشر أو اقتباس أى جزء
من هذا الكتاب إلا بعد الرجوع
إلى الناشر